



支華平先生集附錄

明進士文林郎華平支公墓志銘

京山李維楨撰

男如璿輯



支氏或曰周諸姬派或曰帝嚳時掌天官制于支
錫姓遠不可考矣周有期漢有光世謙亮織唐有
漸與祥宋有國徽勝國有仲願叔芳皆知名叔芳
授徒嘉興嘉興之支自此始也三傳爲樂安丞茂
茂子翰林孔自立立子興濟論高高子寧國博祿

樂安居郡城東牙前橋孔目贊嘉善已還郡至寧
國復贅奉賢里顧氏嘉善之支自此始也寧國季
子爲華平公名大綸字心易三歲端靜不妄語五
歲能屬對八歲通舉子業十二歲詣平山社社中
三試其文應手而成人有神童之目邑令于公拔
第一攝督學事李公聘爲師凡歷七學使及直指
郡邑數十試冠首以爲常袁公坤儀才與季相甲
乙而邑人稱支袁故令少宰周公建書院招致兩
公爲長所師事一菴唐公龍溪王公南屏管公討

論文成之學三公呼爲畏友甲子舉于鄉出少司
徒毛公之門戊辰周文恪公奇其文俛上第而朱
之甲戌成進士出大司徒陳公之門觀政比部日
與諸同志講學讀律閱故具獄儼龍翔僧舍攜一
奴供糲食苦茗出則老奚控款段人與馬成三也
輔臣進紅蓮白燕公言稱祥瑞啓侈心且開禽荒
色荒之竇五月蓮固宜花不足奇燕玄鳥也白者
金象兆爲兵何瑞之有疏艸具同人竊告座主呂
公呂公歎曰若不念父母乎疾走料虎頸編虎鬚

幾不免虎口事遂寢公因乞爲教授去除南昌以名教爲已任諸生不若於訓撻以記之數分月奉若室人簪珥周貧乏已請新學宮復侵地理諸生之爲豪蹈藉者明德正學諸書院生徒千餘人皆以公爲師諸臺時承筐篚乞言其不以禮而以檄徵者謝不能任人謂有李北地風槩又爲文告廟諷當路黜法者公孫弘仄目轅固矣太宰吳楊公撫江右薦於朝故事博士得薦補六館公有前嫌僅擢泉州府推官奉檄而喜吾鄉者從比部郎後

知刑官之難爲也寧自薄乎行至界有永春令貪而暴邑人劫之以兵將爲亂或畱公無行公不可聞之晏子疾不必生徐不必死鹿生於山命懸於厨吾命有所懸矣并道至郡告變者頃時四至公謁監司盍亟圖之監司曰須兵集公曰不然民困虐政無告至此撫之自定安事兵衆曰無以逾公公單騎徃先馳檄諭之有患苦悉赴愬道得愬詞五千有奇圍半解獨諸生不下而學使記到考遺才邑亦當季試爲期試諸生諸生入使人來命詣

省中聽訊諸生出追令不及皆罷而理所懇詞詞
無情者遁去中丞劉公嘉獎公智膽過人不煩一
兵不絕一弦不折一矢而大患謀然已解如土委
地每諸郡有大疑難事咸屬之其秋入棘闈所舉
八人咸名士直指晏公以錄文付筆削士林競傳
誦焉運司管鹽筴利熒山積長吏以不賢黜屬公
攝篆九月而所費金財七分以夜秉燭故已攝晉
江同安兩邑刑名錢穀簿書期會一無叢脞筭楚
不施而事集延見父老察民疾苦進諸生譚道論

文尚有餘取凡乎反大辟百人墨者胥靡以下倍
徙之核永寧糧全諸倉米更爲改折憫卒更役苦
以坊內富民其之分安海堡稅於駟僮以時給機
兵餉與晉安驛供張而除鋪戶襍派若海權無名
藝者水陸新募兵物故流徙不復問汰其老弱食
以飽壯士郡人洪侍郎于江陵不相能閩當事者
傳致其罪公訟言洪公所居一室左圖右史庇正
醜邪范孟博之儔也又爲書具陳天道人情不宜
枉殺大臣事不塞天下心聞者吐舌居期年豪右

無所徇問遺無所受請寄無所聽贖鍰無所私嘗
捫腹而日省其行事曰藉第令遇 高皇帝綜覈
威嚴時無憂矣聞父喪捉髮走出慟哭泣血蹠穿
膝暴而奔士民扶老攜幼送道中終日雪涕呼爲
青天所攜一敝籠無長物無不嗟歎也而母尋病
矣憾不及父醫藥含飲將母寤萬道母卒益柴毀
拮据治葬葬畢屏居綠溪里課子詞章之學經濟
之業溫故知新莫窮其際也初公爲李直指商公
東安溪令卜公訊公陽示嚴以杜諸囂訟口而陰

全之前永春令獄不可反公待之和安溪疑公頗
矍喆而公廉直聲冠列郡同儕嫉之秕政旣釐其
前人又嫉之共爲蜚語中於閩兩臺所當大計時
交刺公劉司徒公僉都察院事駁曰余嘗撫閩閩
人誦支君如一且解官久何例而黜考功曰如兩
臺何姑以降閒散衆怪其故或云公與耿中丞論
學不合或云輔臣嘽彈文復不悅其爭洪侍郎獄
故阿邑之或云侵南昌學基者修隙卒莫能明也
公亦不自明而司馬吳公書相唁公荅之曰程明

道先生精金玉趙抃嘖有煩言人不易知知人
固不易也閉戶讀書知厚有宦於郡邑者五人終
不一面凡七季冢宰嚴恭肅公趣公出補江西布
政司副理問遷客率不事事公夙夜匪懈方伯馬
公重之晝日三接前席淡談公時從司馬太常兩
萬公中丞李公冢宰蔡公若故門人講學如教授
時江右積逋尚方之供多有肯切責曹中丞停祿
而奉新縣爲最以公攝令首繩其尤無良者廖富
九前令公鄉人也富九以前令私人譖公挾摘其
短前令恐介當路者爲地語侵公而馬公已爲中
丞與直指孫公悉其誣奉新人詣兩臺願得公眞
爲令兩臺以聞報可至則務崇寬大旌禮賢士爲
民望裁諸冠蓋餽牽之太多者烏山巡檢捕盜不
及格將妄入人公禁不許熊某盜魁也根株窟穴
難卒拔或以爲言公曰熊十二富有子讀書此非
所爲熊信之攜二子詣公公盡出諸盜案示之語
塞錮諸獄其黨鳥獸散矣邑上下鄉有南北二區
履畝法行失其故爲以三折一以二折一之法而

兩鄉安所上爰書以良史才行老吏法邑人錄爲
挈令有事棘闈見兩生文佳而字違格爲易之皆
第祕不言其人未之知也入覲御史大夫入前令
謗議黜楊太宰公知狀畱公而安溪令姻爲臺臣
以拾遺疏竄公名落職矣買騎南歸義故釀金三
百治裝公笑曰諸君以僕居官廉乎雖無官廉固
在也拾遺疏下所司廉問奉新人人百口保公直
指孫公以白臺客諷公可乘此出間執讒邪之口
公謝曰吾登第十二季爲博士一年郡李十六月

藩幕一年邑令十五日而宅憂強半當壯時不巧
宦今何爲者若所云自取病耳遷居邑城西北隅
江南大饑死者彌望葺室居之作糜食之自鬻者
薄予金卹其券楚中丞常公擬薦公以調行不果
蜀少保蹇公以烏夷亂啓冢宰言公有戡亂才可
令督遼左餉不容益溪居而簡出弔慶事不可已
以諸子代兩臺藩臬踵門辭不見亦不報元旦詣
縣置一名謁而返十九年中僅一入郡城人或約
公出遊公曰吾臥遊之樂不在山水恥居間與錢

通恥居貨與時逐子女各五人婚嫁事畢橐垂矣
一裘一葛不敝不易竹牀縑帷風雨飄搖食小具
鹽酪間市肉客至無加豆而每以肉食食其子曰
讀書苦不可無滋味然絕不許飲酒子勝冠未嘗
衣帛數詔之曰高祖宗衍公五十無子有良民爲
盜所陷憐而白之以其妻薦枕宗衍公却走夜夢
神告之汝有隱德天以文人爲爾子期而生蘧菴
公如其言菊岩槐谷兩公復有厚德宗衍公恒膝
蘧菴公而祝之願兒爲校官人問故曰校官才可

以及人不才不大害人自蘧菴而菊岩而槐谷及
予四世爲校官矣吾自幼及壯免死者三卽官不
達家不饒何患彊爲善而已同學陸生死卹其子
收穀之同榜王某子逋官粟六百當坐戍奔告諸
同人不盡應自捐產償之猶子某少孤公玉於戚
而有誣公匿其私蓄者公憤而白之城隍神七日
其人自搏頰奈何誣止人嘔血而死事伯兄恭生
養死葬無遺憾復其產之轉鬻者士未成名不惜
齒牙餘論獎成而不任德雖操戈無悔也甲辰伯

子下第還公微恙詢朝政及方內人物甚詳疾深
不廢衣冠論諸子吾無可貽若曹惟廉立身惟儉
成廉小子識之忠孝大節聖賢格訓若曹日夕誦
法無俟多言向後言漸省卒之日忽曰俗忌夜亡
起而坐至巳始寢四境之人念之孰有如支公不
侵細民不潤有司能以身爲一方捍災患者乎少
喜韓昌黎爲文豫章以還一意左氏罷歸則括干
古綜百家本朝則羅景鳴李獻吉王元美溪所服
膺文在漢魏以上五七言近體似少陵歌行絕句

似青蓮不得其平則鳴在永昭二陵編年史大指
重節槩崇實德煥文學非然者譏刺不諱或風聞
容有訛誤而觸心索癥爲罪幾成怨府里富貴人
謀入祀鄉賢公鄙之是以泮宮爲墮間也語諸子
我死必李本寧志我余不文公過聽謬許逐臭嗜
痴其憎多口不亦宜乎越七年而伯子如玉以遺
命請爲狀萬言擬古聞人汲長孺王休徵郭林宗
諸葛孔明嵇中散陶士行范希文程伯淳邵堯夫
蘇子瞻事皆詳覈而淡惜公生不遇時沒尚以危

言爲貝錦資也余恨不識公辱公知不敢負節狀
之半識其大者如右而繫其生卒若子姓婚姻如
左公生嘉靖甲午四月一日卒萬曆甲辰四月二
十有一日年七十有一配嚴孺人嘉興太學從節
女助筵者爲李爲顧爲張爲金丈夫子五人一日
如玉庚子舉順天鄉試第三十九人娶漳州守曹
銑子太學沈女二日養訥邑諸生娶建昌檢校趙
體國女三日如金邑諸生貢入成均娶文學陳光
初女李出也四日如瓏國子生娶郡廩生於行順

女顧出也五日如增娶太學蔣懋勛女張出也女
子六人適曹以庸廩生戈靖邦于時保嚴出也適
太學張夢龍李出也適諸生卞玄極金出也字廩
生沈紹曾子憚張出也孫十二元素邑庠生娶華
亭尚寶卿徐瑛女中約娶侍御顧爾行子太學堯
京女允堅聘憲長陳于王子文學山毓女如玉出
也朝弼國子生娶都事薛瑞熊女養訥出也元哲
聘給事中葉繼美子太學培忠女中繪允灝如金
出也鴻祖鴻基如瓏出也如增出者三尚幼孫女

二人適進士馮盛典子太學季鵬文學余允功子
秉正如玉出也會孫一朝弼出也卜丁巳年九月
十一日葬于西律圩之新阡銘曰

帝筭亮陰聽于執政威靈疑主無或衡命公獨格
之詞嚴義正能毓屈軼觸邪指佞夫何以故自其
天性驚不匿影口幾典戎辭尊居卑保此微躬驟
乘芒刺卒以凶終曲突徙薪誰與論功直道三黜
造事而寤拊膺自省方寸靡慙訓士士典字民民
服御史吏畏所在尸祝一毀有餘百譽不足懸世

無悶儉德無祿尚友千古怡情一編著爲史記如
司馬遷片言隻字操袞鉞權知我罪我恒在斯焉
呼牛呼馬鼻頰且穿舌腕可割難奪吾志藏諸名
山以俟後世政事文學孔科有二而貌大人卓犖
高義升沉榮辱浮雲等視艱難險阻不失厥貞名
用毀高身用名榮人孰免死死孰如生嗟一杯土
其中有精產爲宰木是曰華平

支華平先生行狀

鹽官劉世教撰

不穀垂髫時則聞郡中有支先生者雅負異材於
學亡所不窺意不可一世甫第春官輒艸疏欲糾
故江陵相祥瑞事心竊奇慕之已聞先生骭髀仕
路竊疑先生材若彼業已鵲起而胡弗竟遇數起
數蹶旣錄京兆獲從先生伯子游乃始悉先生生
平以爲先生者不難乎遇而難乎其不遇者也浮
沉幾十禩伯子從逆旅中授簡以先生狀見屬不
穀其敢以不文辭按伯子所自述支系自有周或
云帝營始制支干以官命氏遠弗可攷世多聞人
於戰國日期於漢曰光世曰謙曰亮曰織於唐曰
漸曰祥於宋曰國徽於元曰仲頤曰叔芳叔芳授
徒嘉興始繫籍焉所謂幽齋先生者也叔芳生慶
生慶生生子傑子傑生茂永樂初以貢丞樂安寔
有隱德茂生立正統甲子舉浙江鄉試第四人仕
至翰林孔目邃於經術時稱支五經蓋自是文獻
之緒啓矣立生高亦以貢諭興濟高生祿貢於
廷爲第一授寧國博始樂安居郡城翰林贅嘉善
已復還郡至寧國復贅嘉善嘉善之有支氏寔自

不穀垂髫時則聞郡中有支先生者雅負異材於
學亡所不窺意不可一世甫第春官輒艸疏欲糾
故江陵相祥瑞事心竊奇慕之已聞先生骯髒仕
路竊疑先生材若彼業已鵲起而胡弗竟遇數起
數蹶旣錄京兆獲從先生伯子游乃始悉先生生
平以爲先生者不難乎遇而難乎其不遇者也浮
沉幾十禩伯子從逆旅中授簡以先生狀見屬不
穀其敢以不文辭按伯子所自述支系自有周或
云帝嚳始制支于以官命氏遠弗可攷世多聞人
於戰國日期於漢曰光世曰謙曰亮曰織於唐曰
漸曰祥於宋曰因微於元曰仲碩曰叔芳叔芳授
徒嘉興始繫籍焉所謂因齊先生者也叔芳生慶
生慶生生子傑子傑生茂永樂初以貢丞樂安寔
有隱德茂生立正統甲子舉浙江鄉試第四人仕
至翰林孔目遂於經術時稱支五經蓋自是文獻
之緒啓矣立生高亦以貢諭興濟高生祿貢於
廷爲第一授寧國博始樂安居郡城翰林贊嘉善
已復還郡至寧國復贊嘉善嘉善之有支氏寔自

茲始先生爲寧國季子名大綸字心易學者集之
爲華平先生生而奇穎三歲端靖不妄言五歲能
儷語八歲能屬文十二歲往平山遇文社探目輒
就一時詫爲神童比出試則邑令于公業首鑒識
之攝督學使者李公文進因延之家塾嗣是試必
冠軍若鄆若邑若直指使者若學使者無慮數十
人咸以得先生爲快了几袁公黃名噪一時每兄
事先生邑令周公案闕書院羅名儁先生與袁狎
主其盟周公禮致耆碩如龍溪王公南屏管公輩
先生北面嚴事探訪文獻之學意不欲以帖括見
矣甲子舉浙江鄉試爲毛公綱所舉戊辰試春官
周文恪公擬首薦弗果甲戌成進士爲陳公棗第
三人儷舍蕭寺僅從一稚奴讀書繙律益潛心用
世之學徵逸燕會悉謝不與會江陵有紅蓮白燕
之獻草疏且糾之同年有覺者以白座主呂文簡
公厲語抑止不果上內不自安乞改南昌授地故
都會而時方藐膠杼爲冗員先生嶽嶽自亢學舍
圯則請新之宮牆或有蠶食諸生或有蠶厄則必

引繩力爭至爲文告廟以風當道諸子衿講業明德正學諸書院者踰千人先生一一程課之惟謹學使者受成焉開府楊中丞成特薦於朝故事當超拜京秩終以前疏嫌僅移臬司李甫入境而永春許令暴於邑邑民至操挺刃以爲難或有尼先生行者先生毅然請前諸監司乃曰無易公矣解是紛者先生至則散遣諸構者五千餘人而猶有未解者則博士弟子陰主之乃借試事以令諸士立解而令始得去邑用以寧嗣是閩有大役咸以屬先生矣丙子共事棘闈得士八人竝知名當世於時鹺司多稅政簡擇以往九閱月而風蠹頓清已攝晉江攝同安直指使者稽察之檄旁午而至先生應之裕如也丁丑開府龐公尚鵬發故安溪俞令罪狀先生當獻先是永春獄先生旣嚴于法乃陽寬之以示體安溪破甑亡恙遂厲色以鎮訐者而令反恚甚丙戌之讒有自來矣先是江陵修風怨於遼藩圖覆其社而蒞訊者少司寇洪公朝選議相左洪以是罷里居或將物色以獻猶先

生執不可終先生李泉洪獲免於難去未幾而既
及矣它若足兵食稽郵政覈積貯或更改折或均
力役以至革海艘之橫權去市廛之苛賦酌戍卒
之勾調釋重辟之寃獄諸懿政不可更僕數賢聲
藉甚八閩矣其秋而寧國捐館之間至聞報遄發
賻贈盡郤去之日攀號松道又未幾而邁太君戚
哀毀如喪寧國當是時先生雖宅愛家食而閩中
使者報命薦剡無虛歲歲庚辰中丞耿公直指敖
公忽交章糾先生中丞劉公思問故嘗填閩時方
佐計事雅知先生力持之乃從左遷先生居官故
嚴慎竟不知讒所自起一切不問而屏迹綠溪之
野若不知宦途之有起躡者居七年爲癸未太宰
嚴公清強之出乃補豫章藩幕不以遷謫故鄙夷
吏事左使馬公文煒遇以國士不復用幕下儀於
時豫章多名賢若見羅李公輩先生時過從精晰
性命之學聲稱聒李泉時益著開府曹公以奉新
多逋賦遂借先生攝令事至邑政一新有廖富九
者暴橫於里先生收而置諸法廖遂爲蜚語譖於

前令朱時當道有左袒前令者將煤孽先生而馬
公適晉開府讒用終屈奉新士民請以先生爲真
令馬公疏得請先生益務爲寬大廣厲功令崇獎
風軌邑故苦盜司干振者徃徃羅織爲功禁不得
逞調停清畝之法或以倍入或以參入而沃瘠並
安盜魁熊十二擁貲自完先生以計致之獄成而
宵柝寢矣邑雖僻而地界處楚冠蓋相屬先生裁
之以法遠人不擾乙酉秋復入棘闈有二士文藻
豔發而字格小戾先生陰爲竄正遂獲竝薦然終
不以語人明年春當計吏而前奉新令之釁發主
計者或陰佐之太宰楊公巍持之堅若曰此賢者
我故知之業已定議而西臺有爲故安溪令姪者
竟甘心焉乃以拾遺論罷一時議者無不爲先生
不平而先生怡然不屑也門人故知釀三百金以
治裝先生笑卻之已而有 命行勘奉新士民群
起稱枉當道咸直先生身雖隱而事終白矣時有
諷之出者先生堅謝不應曰予自甲戌牽緣迄今
十有三年一司教一司李一幕藩一宰邑久不能

及再歲而薨者不及歲乃幽居踰七歲所髮種種
矣安能折腰少年前爭腐鼠爲蓋先生材足用世
而不肯矧其操以偕俗志亟匡時而不屑挫其守
以詭遇以故寧爲玉折不爲瓦全寧爲直道之三
黜不爲善宦之九遷以視脂韋媵阿隱忍以就功
名者孰得失哉歲丁亥卜居邑郭時江南大祲先
生殫力而拯卹之所全活頗多中丞常公居敬司
馬蹇公達先後薦公竟以無援阻杜門塞兌若不
與人問世者卽干旄在浚多不出應或以簡貴見

嘗先生亦終弗應也雅性儉樸不事修飾一遇權
貴若將浼焉有匿影避耳棲蓬蘅泌十有九年而
一入郡城其高潔慨可見矣乃若篤厚交誼爰人
陸生歿而子弱力擁樹之同年王君子負官粟數
百法甚厲先生與今大司空丁公竭力營助卒脫
其辜族子某幼孤先生保護之甚力有誣先生私
寄其橐憤而矢諸神不數日誣者嘔血死性好著
述爲文矯矯有古風詩歌步趨三唐其最所注意
者尤在編年一史是非予奪壹以獨見衷之知我

罪我所弗惜也嗟乎夫士患非材耳材矣患弗遇
時乃以先生之材際會風雲而阨塞以老使 國
家弗竟豪傑之用誰寔爲之將遇者不必材而材
者亦不必盡遇邪蓋不穀所謂先生之不可及不
難乎遇而難乎其不遇者矣乃其政績畱兩地餘
慶食來茲文章風誼流映不朽寧藉九命三錫爲
重哉先生生嘉靖甲午四月朔卒萬曆甲辰四月
二十有一日得年七十有一元嬪嚴夫人太學從
節女子五長如玉舉人娶於曹次養訥諸生娶於
趙次如金國子生娶於陳竝李出次如瓏國子生
娶於於顧出次如增娶於蔣張出女六一遼曹以
庸一遼廩生戈靖邦一遼于時保竝嚴出一遼太
學張夢龍孝廉同出一遼庠生卞玄極金出一字
沈楫張出孫十二如玉出者三元素諸生娶徐中
約娶顧允堅聘陳養訥出者一朝弼國子生娶薛
如金出者三元哲聘葉中繪允灝如瓏出者二鴻
祖鴻基如增出者三尚幼孫女二一遼太學馮季
鵬一遼余秉正如玉出曾孫一朝弼出婚嫁皆著

族卜丁巳秋九月十有一日葬公于邑西律圩之
新坪

明故文介先生華平支公墓表

西陵黃彥士撰

余辱支伯子交以文章道義相切劘凡十餘年矣
癸丑伯子上春官持其父華平公狀及李本寧先
生所撰公墓志銘委余表公墓余未奉教公然有
若翁誼矣何敢辭支氏出帝嚳時掌天官制于支
錫姓歷周漢唐宋勝國俱多顯者公高王父宗衍

公五十無子常爲良民白奇寃民念無以報攜妻
侍寢公卻走夢神人相告汝有隱德當庸文人爲
汝子遂生遠菴公傳至槐谷公皆爲官司校至
公登甲戌進士復首除南昌教授云世傳文人筆
師士席皆灼爍于公故公著述充棟邇海內膾炙
之而爲諸生嘗師事唐一菴王龍溪管南屏三先
生討論文成學故教南昌諸明德正學書院生徒
千餘人皆師公其教人大抵依名教尚氣節自善
詩古文而皆題曰技餘其學有本可知也再任泉

州府司李行至界永春令貪而暴邑人劫以兵將
爲亂或畱公無行公不可至郡謁監司盍亟圖之
監司欲須兵集公曰不然民困虐政無告至此撫
之自定遂以屬公公單騎馳檄諭之有患苦悉赴
道愬圍遂解一時當路服其智膽仰渤海治亂弗
過也而治獄多平反改折永寧福全諸倉米均率
更役苦除舖戶徼派泉至今賴之拊運司鹽筴將
期月止以夜秉燭故費金錢七分行法介介無敢
問遺者聞父喪徒蹤走出慟欲絕士民扶老掖幼
泣別公而僅攜一敝籠無長物也尋內艱柴毀治
葬如禮初公登第時值輔臣獻紅蓮白燕公具疏
論其稱肩端啓侈心雖座一呂公力止之疏未上
而輔臣已聞嘆之因乞博士及爲臬理又力救侍
郎洪公具書兩臺陳天道人情洪庇正醜邪不宜
聽權奸傳致具罪枉殺大臣事得已而蜚語私中
之竟以李降聞散矣家宰嚴恭肅公趣公出補江
西布政司理問遷客傳舍其官公獨不然而與故
門人講學如教授時尋補奉新令務敦大旌禮賢

士烏山巡司捕盜不及格將妄入人公禁不許而
計致盜魁熊某根株難拔者竟自詣公履畝法行
公爲南北鄉制法兩安之他約束一切以惠利爲
本而飭豪勢以法迫入 覲而臺臣又中姻姪流
謗拾遺落公職矣義故釀金治裝峻却之奉新人
百口保公竟不自明居家簡出兩臺藩臬知故宦
浙者踵門辭不見亦不報一切愧問咸謝絕惟元
且詣縣置一名謁而返十九年中郡城僅一入也
嘗捐產補同榜王某子逋官粟幾百撫猶子某孤
玉之成事伯兄最恭生養死葬無遺憾好獎掖後
進令之成名臨卒訓諸子惟廉立身惟儉成廉蓋
公生平寔履也而官跡所至輒見思以不能浮沉
故前後服官僅四三年耳正直者自應爾矣余少
時讀通紀以爲筆弱紀事不明瞻議與識不練確
及讀公永昭編年史良史才也功業文藻皆不究
其用公喜昌黎文豈亦子瞻所謂磨蝎星俱在命
宮者耶以方古名德大儒若汲長孺之亢直郭林
宗之造士范希文之擔當邵堯夫之恬逸范史雲

之廉潔詎有愧也余忝簪筆柱下敢與公門人私
謚爲文介而復撮其大者標于石曰明進士文介
先生華平支公之墓仍系之以詞云空其腹緋而
金惟博與中公淡指斯繞無不利彼負乘公宜棄
師孔顏學杜遷公兼之天子全操與名忌詎掩勒
之珉表垂遠

華平支先生墓碑記

華亭曹 蕃撰

支氏在吳越間瓜陔不甚蔓衍然錫姓從天官家
來則數千年矣語云豪傑之士雖無文王猶興余
故不暇遠引華胄爲支氏譜牒添蛇足止紀其占
籍于嘉興者始焉勝國時有叔芳者繇宣州徙家
開絳帳授徒居郡城之東牙前橋三傳而爲茂永
樂間貢授樂安丞茂子立正統甲子魁瀾省終翰
林孔目世稱爲支五經立子高高子祿竝以貢授
郡邑博上祿資于嘉善之奉賢里遂籍嘉善祿之
季子是爲華平公公名大綸字心易由制科起家
官僅七品寓內共尊仰之不啻泰岱北辰云而嘉

善之支乃益大公童時最穎慧日記可萬言十二
歲行文倚馬縣令拔冠儒生嗣自學憲按臺及郡
邑前後數十試皆冠焉靡有屈居第二者文名鵲
起甲子薦甲戌第僦舍長安儼然自負前哲典刑
其饗殮袍服輿馬之費自喜寒儉謝絕同官華麗
態時輔臣磨殊寵獻紅蓮白燕公將諍之母啓祥
瑞蕩 上心疏具矣次輔座王呂公恐公危言賈
奇禍也厄之謂宜避地去公因向鄉紳曰我祖孔
曰公狹時樂安公撫之膝笑謂願兒爲校官校官
才可及人不才不大害人今余家校官三世矣其
慰吾祖父于夜臺乃 奏乞改南昌府學教授乍
領青氈卽復學宮侵地在廣文儕輩稍露鋒穎當
路謂是教授也才盍遇盤錯而可久困之苜蓿欄
干邪遂擢福建泉州府節推甫及界會永春許令
貪而穢邑萬衆操戈逐之諸青衿爲盟首勢洶洶
叵測公謁監司一餉間報邑亂踵至監司議須集
兵乃定公獨單騎入郡先馳檄徃諭當救民于水
火急趣訟人來沿途收五千餘牒因陡集諸生就

試而急繫許令人會城聽鞠乃審愬詞無情者遣去許令卒就理驩聲載道中丞劉公重公排難解紛如承蜩然屢膺獎薦會臬郡所轄晉江同安邑時時乏令遂檄公攝篆公撫篆若將免焉不得已受事兩邑稅政引繩批根而力雉之公又嘗攝鹺司篆鹺司利藪也攝篆九月祇以暮夜燒燭費帑金僅七分毫無染指退食暇嘗焚香祝天曰曩令臣得當 高皇帝綜覈吏治時安枕矣忽父訃至戴星而奔一疇不以着身久之復遭母喪合葬父

母俱成禮葬畢居倚廬如諸葛之寄隆中譽望日重暨庚辰離任幾年矣各不當入計吏籍奈公居李時以強項起聲縮符時革故鼎新又似太甚僚屬滋不悅也遂傳致貝錦于閩兩臺兩臺白簡從事僉院劉紫山公舊嘗撫閩知公名爭之考功不能得竟以降閒散處公公屏居綠溪里凡七年至癸未春冢宰寅所嚴公重公才而又憐公之久淹也補公江西副理問理問散吏卽英雄乎亦安所展長技惟日從李見羅諸先生倡道東南江右

士風翕然丕變會奉新之積逋盈萬撫臺曹荔溪亦奉嚴譴遂檄公攝奉新令冀公急徵科如額寬前令責邑豪廖富九者橫甚廖前令狐鼠也公按如律廖遂糾胥史譖公于前令前令百計孽公時上下悉公調護前令微指謂奉新不可一日闕公具疏薦公公遂爲真令矣至縣裁郵餼禁妄捕劑上下兩鄉稅計給盜魁熊十二熊輒攜二子跪階下訴公盡出盜案向熊讀熊俛首遂錮諸獄熊獄成路犬無夜吠治邑聲遠出于治泉州李時乃前

奉新逋令終望公造蜚語入趙麟陽總憲總憲議黜楊冢宰爭之疆已註畱會河南道周公某掌察事受私囑竄公名拾遺疏中竟削公宦籍歸洎遵旨行勘莫能緇公客諷公可乘時再出公笑曰余從甲戌第後初乞司教擢司理左藩幕遷縣令四任甫及五載而宅憂強半圍圍自適吾口不耐囁嚅安往而不三黜乎遂築室于邑城西北隅爲政于家歲大侵糜其孳者全活可數百人同社陸生有遺孤不勝匱乏時時解推無倦色年家子王某

負公廩千斛官繩之亟公聞而奔告同籍不能盡
應公乃轉貸償之得免戍公撫孤姪甚篤摯族裊
猶有誣公匿寄藏者公憤而爲文訴之神七日而
族梟忽向神廟稽顙顙破血淋漓死伯兄敞屣祖
產公勉力爲兄復灌鄆于一姓今兄子不以爲德
反以爲讐士未知名公不惜齒牙爲後生獎掖竟
爾操戈公亦絕不介意嘗歎曰世界茫茫誰與寤
語其竊比我老彭乎惟安心游述作之林矣詩不
屑拾三唐人頤殘自成一派文亦恥效輦漢魏大

闢堂奧開今人所不敢開之口挺然欲執牛耳指
揮東南半壁卽進嘉隆間弁州歷下諸君子與公
稱雁行公弗悻也所著十餘有闢綱常則書涉經
濟則書裨民瘼上風則書瑣瑣雕虫懶累三管至
永昭編年史出知我罪我者半矣是書也惟闢節
俠戮奸宄輕軒冕獎隱逸睥睨一世譏彈罔貸真
士讀之則喜聞士獵之則疑每摘公所瑜瑕人者
而反瑜瑕公余游長安時有詞臣評隲憲章意不
能爲公左袒也向余曰君家隣于武唐二陵史謂

何余對曰史失之朝得之野必抄謄累代腐爛朝
報乃成信史邪必冠絢盡被華袞方可秉如椽之
筆邪詞臣默然公聞之勿顧也將大竟殺青業藏
于名山石室之下以俟後世亡何病作年七十一
矣甲辰孟夏病已劇適伯子如玉謝公車還乃集
諸子啓手足而誡之曰吾其免夫家世儒門性喜
簡樸敝居數椽無懷題棗稅之華風雨作橫軋軋
有聲虞圯食亦具肉醬不覆簋賓客沓來簋數如
故腰間傲骨避公門若仇歸田十九年僅一入郡

元旦亦挾刺投縣庭而返沒齒未嘗受訟人金錢
鼓脣舌于郡邑學縱橫態須吾儉乃成吾廉小子
識之吾今日曳杖矣儉于生忍奢于死乎平時嘗
聞楊王孫藏葬怪其迂誕追思物理良亦曠達彼
王簾屢匱中藏可欲幾罄南山銅矣而竟成野燒
鬼燐之場乎古尋幽徒增感慨尼父氏曰古不修
墓非死欲速朽邪吾志如此幸善體之諸子今覓
地酌于豐儉之間築成馬鬣樹石墓道爲公題曰
泉州阡伯子貽余書謂忝列葭莩無煩曲筆先君

其引領于九京矣余曰諛墓吾所恥也遂直書公
行誼政蹟及大著作可垂三不朽者報伯子鐫于
石爲支氏墓碑記

華平先生傳

同邑馮盛世撰

壬子夏余方避炎圃中手陳編而太息曰古之人
古之人美矣懿矣夔難企矣何今人之不逮古人
一二也世降然歟抑自棄歟而亡何閭者以支伯
子書至且以先公華平先生志狀相遺也捧讀甫

訖乃作而颺言曰此真今之古人也余昔親聆馨
歎而得其心神今何幸得之簡冊而益可揚摧以
範俗也又伯子書欲得爲先生傳發志狀所未盡
余嘗以近事爲監而辭伯子復以書來且婉言子
爲文家司南宜作一先子行誼惟子知之詳宜作
二不肖又辱臭味未宜作三而余復念昔者先生
謬重余延余淑仲子而余實淑于先生爲多是一
宜作也余憤世爲作輕勢篇千言而先生善之至
作九辯泄余未竟之懷是二宜作也余有兄弟而

不挾且不借以漁獵于鄉若世俗然而先生至同
葉給諫十餘紳絢之彥以拔俗清標扁贈我而又
嘗以清貞先生稱我知管莫如鮑是三宜作也伯
子所言三或過而余三言豈以自誣故不敢再辯
而以管蠡爲傳先生傳曰支先生諱大綸字心易
學者尊之爲華平先生嘉善奉賢里人也高祖茂
居嘉興郡城東生子立爲翰林孔目世稱支五經
立生高高生祿皆爲校官祿徙嘉善生先生先生
于諸子季也幼卽岐嶷不凡人以神童目之嘉靖
甲子舉于鄉萬曆甲戌登進士第觀政比部輔臣
江陵以五月紅蓮及白燕獻于 朝先生聞而詈
之曰是侈言艸木之祥開禽荒之漸以蕩 上心
者也烏可弗杜擬疏欲入呂座師知之大憝尼不
行已除南昌教授復學宮侵地士風一變無何轉
推泉州議處泉屬事宜小大中窾畧具先生集中

永春許令暴而黷邑人叛思起刃令檄下先生先
生單車行縣解士民之憤而事以寧又郡人洪侍
郎朝選與江陵忤江陵密以意授撫臺麗公欲置

洪于法先生念洪寬力救之以牘上撫臺其畧曰
夫洪家不過中人居恒左右圖史口談性命是今
世之矯矯者也今坐以反唇大逆如天道人心何
昔莽操以彌天智焰一叱而雷霆奮一領而雨露
滋真宰不能撓其權二曜不能違其筭洎理窮勢
極莽坐宣室死于漢兵成濟一戈曹無噍類何向
威福之崇而今敗亡之酷也彼其之子面承風旨
憤于聲利謂洪可殺是不識禍福安問名義惟卒
全之事得解泊先生以王父憂去去而承奉者以

此故文章勅先生修夙昔之隙後嚴冢宰清悉其
枉出補江西副理問理問散吏也僉謂先生才宜
不事委填而先生遇事輒辦上官重之已攝奉新
令篆不問紛拏皆得其理奉新人欲得先生爲真
令遂以臺疏薦令奉新而舍沙以射者俟其後
矣及拾遺之疏人而先生落職去奉新借寇不遂
先生歸奉賢里再徙邑治西日扃戶謝客著書課
子而已素性不習時態不務干謁不畏強禦不近
匪人不事生產橫逆之來順以受之陶然自得無

懷葛天以上人物也而尤重節義憤世憂時酬知
紆禍時邑宰設局修乘所載諸節烈非一而獨遺
死友徐節婦先生聞袁公黃在事徐亦袁死友也
袁故以婦年不合格不書而先生以年合格爭尺
一往返幾如聚訟而婦得書寧夏告變封疆之臣
皆膽裂避事而先生不勝憂懣嘗吟狂士詩云踏
破賀蘭后埽清西海塵布衣能辦此可惜作窮人
一日謂余吾欲構四恩堂余曰何謂四恩先生曰
若親師知己也余曰師惟授業者乎曰否座師亦
所為師也我座師拔我一也余曰若何爲知己先
生曰如昔管子所稱知也卽有相觀相規而以意
氣合者亦知也其欲酬衆恩而不負如此又忽謂
余子見今士人皆欲冠軟翅巾及衣軟熟紗綺也
不似三十年以前人人角巾方幅衣也則習俗喜
柔軟惡剛正類然吾輩何以免於世性不務于謁
然喜薦士遇有司試士有可薦亟薦之不令士知
也曰士才而有志者嘗恥于人以此益信先生其
古人云生平素無疾一疾輒不治年七十

有永昭編年二史及文集六餘行世有四餘尚藏
於家子五人如玉卽伯子善詩文能世其德中庚
子順天鄉試

清貞居士曰支先生質直好義篤信善道在孔門
不翅顏閔行而政事文學有兼擅者洵乎于鄉爲
耆碩于國爲名世也稽之祀法有能宗經翼聖開
示來茲者得列文廟左右庶否亦得與鄉之先賢
竝諸名宦故吾鄉以一節稱者皆得祀而先生與
一二偉人尚未有議夫以先生之才德淳備遐邇
攸宗卽繼顏閔諸人從祀兩廡與素王同血食亦
復奚忝乃未得與一節稱者同祀鄉賢凡在私淑
者靡不頓足恨雖祀與不祀無足爲名賢軒輊取
偏遺全輿論謂何故特爲闡其幽俾收采者得有
攷焉

先考華平府君行述

不肖孤如玉述

痛哉府君之棄不肖孤也棄不肖孤甫百日而不
肖孤卽邁厲疾御悽茹歎宛轉牀褥者凡十有四

月已自分從府君地下遊乃不意復起爲人定中
思痛欲詮述府君行畧乞言于名世而人事流遷
驚心慘骨因循歲月又恐一旦填溝壑竟湮先德
於是枚淚濡毫惟鴻願大人垂采焉按自帝嚳歷
日月制于支世掌天官家以官爲氏支氏之錫土
姓自茲始周衰溺其守而戰國時支期與樓緩止
魏安釐王母入秦漢元光中光世公偕博望侯臣
月氏功進爵西涼郡王及謙生亮亮生纖世稱天
下博知不出三支唐高宗朝祖漸以孝行旌故宇

有來鶴軒事在孝順事實中時有嶺南節度使名
祥者五代子姓益蕃爲瑯琊最著淮北今有支家
河宋南扈踣隆興家西山而國徽公舉進士第洎
諸弟先後登第者二十五人至三一公承于宣城
有子仲頤徙吳卜仲頤生叔芳授徒嘉興世所稱
幽齋先生文藻高潔善繪事支氏始繫籍嘉興叔
芳生慶生慶生生子傑子傑生茂字宗衍永樂五
年以貢爲山東樂安丞宏才偉畧有隱德茂生立
爲蘧菴公先是宗衍公奉 敕督生銅黑鉛於廣

西卒於慶遠道中立甫十歲二母守節教養資給
極辛苦績學累行舉正統甲子浙江鄉試第四人
仕爲翰林孔目郡邑志所稱事母以孝著與羅文
介相友善務敦本爲己之學尤淡于經學人稱爲
支五經自遠菴公以文行冠冕一時而嘉興支氏
蔚爲文獻矣立生菊岩公高亦晚亦少孤後更自
奮策文行爲世軌式亦以貢爲興濟縣學諭高生
祿號槐谷是爲不肖王父性卓犖多大畧於學無
所不窺歲戊寅督學汪公文盛試冠諸生廩於縣

官場屋聲藉甚數入教不偶己酉貢之春官名在
第一再對大廷皆冠天下上仕爲寧國郡博東贊
不行俎豆煙滌學憲吳公遵薦諸朝方之楊伯
起云先是宗衍公居郡城東牙前橋遠菴贅於武
唐因家焉以故邑乘稱僑居菊岩公仍歸郡矣王
父復贅奉賢里顧時軒家而長宗一脈因爲嘉善
人乃奉賢里有豪隣鷲而鵬數齟齬王父而王父
坦中直遂陰墮其機獲幾與豪以器訟相終始而
諸父有壻於豪王父所恃和親以紓難者徒以延

家庭之寇而莫之振卽至府君而禍終不解也府君爲槐谷公季子名大綸字心易別號華平先是諸父皆以文行名王父大望之而久需不售至府君意頗懈乃府君性奇穎甫三齡卽有異凡兒終日兀坐五歲而屬對英敏無偶八歲能文十歲而學成十二歲徃平山遇文社輒就諸友索題一揮成三義皆以古文行時調合郡相傳爲神童云出試則邑令肖玄于公業拔爲第一人而署督學事同野李公文進因延置西席以公輔相期嗣後有試必首非首卽令邑人意弗愜府君亦弗愜所歷學使無慮數人直指郡邑試無慮數十人咸以得府君爲慶若方山薛公中方范公虹川秦公松坡畢公尤隆國士之遇者奉賢里乏習制舉義者尤乏有古文詞者自府君以髫年兼擅作者之場一時聲鵠起儕偶不敢以雁行進卽了凡袁公兄事府君里中稱之亦曰支袁乃曩所爲隣豪者日眈眈思府君大成以酬王父夙憤歲丙辰王父待次公車乘島夷亂操戈以撼府君而甘心焉會有天

幸以免然府君卽歷諸坎壈而淬志精進鄉曲之
譽日益起時邑令三泉周公寀建書院延府君及
了凡爲長而禮致四方名儒如一菴唐公龍溪王
公南屏管公府君先後皆北面事之潛心姚江之
學諸公咸曰子吾畏友也甲子應鄉試則御史黃
公廷聘本房小山毛公綱舉爲二十四人時府君
年甫壯思得一當以有聞於世繕性潔修足不入
城市戊辰上春官徵菴周公子義擬冠本房屬府
君一鄉同籍分考闈中修睚眦怨故於總裁處譖
落之周公向人輒扼腕太息至甲戌則應虹陳公
菓舉爲本房第三人府君旣成進士益以致身自
命日從諸名公會講於京邸寤聖學真詮觀政比
部 朝參外講明律例究心疑獄假館龍翔菴一
朴僕啜蔬食出止一欵段澹如也諸凡宴會徵逐
一切不與時輔臣有進紅蓮白燕者府君謂非輔
臣所宜具疏將劾之疏畧云元輔當以道德匡君
不宜啓禽荒色荒之竇五月盛陽蓮固時卉耳燕
玄鳥也而反白白者金象於兆爲兵奚瑞焉會同

年有知之者密告座師呂太傅太傅趣徃厲語曰
相君方有時名子敢議之目不辨倉素矣且子亦
無居此以溷乃公爲也府君迫於太傅不敢上亡
何 奏乞南昌府教授南昌故會省而世故藐靡
序爲冗員可侮府君至獨持丰裁有犯必裁以法
學舍圯請於臺使者一新之宮基在闐闐大爲勢
宦所侵軼諸生亦數數見侮于豪者府君咸申院
司一刷復之間有告廟文以惕所司之愼選者生
徒肄業豫章明德正學諸書院者千餘人府君程
其勤惰而品其優劣廩餼弗給者分俸畀之不足
質簪珥繼之卽督學使考校所取舍每質成府君
府君亦厲操平衡弗妄軒輊部使者待府君如大
賓凡有大文字必藉府君顧府君自視甚峻文以
檄來者不應秉節嚴範士風大振江左人咸方之
北地李獻吉云時巡撫震厓楊公成特薦於 朝
故事博士師得薦者例遷京秩府君起制科尤稱
是而以前疏故不得入轉推泉州府君怡然曰臣
子爲縣官用寧論內外資且使吾釋文學而操刑

名舍諸生而對伍伯奚非盤錯之會也丙子六月
行至福建會城而泉郡永春縣墨令許某者暴於
永春邑民願與偕亡至挺戈刃爲劫庫殺官携資
據城計興化同年有愛府君者阻宜少緩行以觀
變府君弗是也徹夜行至郡未幾任人見監司不
一畧而報亂者七至咸錯愕無指府君曰郵報若
斯不出一策何也監司曰俟集兵徑定之府君曰
小民困于水火遂作此狀誠得寬仁長者扶義而
西宜自定耳毋事張皇毋煩兵革諸司曰無以逾
公矣府君慨然任之乃單騎戒行急遣二十牌諭
以除暴安民意約於二十舖中收訟楮人咸爭先
赴愬沿途計得五千餘一一核示審期時城圍半
解矣比至邑而猶有未解者則有諸生陰主之遂
示考遺才季試科舉者諸生旣入試而檄束許令
赴省候試及諸生出而令去無可爲兵端卽前諸
訟虛心平鞠一日凡二千餘誣者咸相率遁去邑
用以寧是役也非府君單騎宵征而曰徵兵徵兵
則不數月不殺數百人不定矣時撫臺劉公瓚蒼

亟獎爲智膽過人嗣是八閩有大難任之事咸屬
府君一時八閩府貳無出府君右秋試分考本省
鄉闈得士八人咸以名進士起家且有豎立者試
錄咸出府君手裁則按君晏公士翹所專任云時
運司樊孔百出運長挂吏議以行兩臺委藩臬會
推廉敏府貳往視篆則以屬府君府君與利除弊
矢節矢力凡九閱月而所支用司中銀七分以夜
行市燭故也時司晉江篆又司同安篆又司運司
篆而按臺查盤之委生儒考校之煩府君以一身

任之有餘地焉丁丑撫臺惺菴龐公以所廉安溪
令俞某委勘時物議狼狽而府君猶委曲全之先
是所勘永春令府君以令收極不可全故嚴于法
而寬于貌至安溪令府君業已令破甑無恙遂不
敢假聲色以服訐者之心而令反恚甚卒以此爲
府君丙戌被讒張本云郡有侍郎洪公朝選貳于
江陵江陵授旨閩撫按置諸法密下府君廉其事
府君躬謁洪公共談徹夜歸報云洪公勁節清風
左圖右史剛方絕俗庇正醜邪古范孟博其儔也

諸不法事無可廉者又爲書具陳天道人事甚悉
洪公得緩死者數年當是時府君旣淬志豎立而
當道又相信之淡知無不爲爲無不就如發機兵
之餉錢給晉安驛之站銀核永寧福全等倉之蓄
儲則更改折寬更夫之役則欲坊內富家出力共
守陲安海之稅令各牙計派齋納以至革無名之
海權去舖戶之徼差處水陸新募之兵死者勿補
逃者勿勾調之南北汰其老弱而令泉中無脫巾
之虞委問重辟平反肆出者不下百人其軍徒笞

杖由重卽輕者無慮三倍以至鞭朴不敢妄施錙
銖不入私橐府君嘗仰天掀髯曰吾持此治行卽
見 高皇帝無愧色也故議者謂府君法不遺強
仁必逮賤豪右頗知畏忌販備甚荷撫循革百年
倍尅之窠曰擅一時廉敏之駿名官邪非萬不可
庇者必緩爲保全之策過行得諸風聞者不形于
揭報之微一時編氓以至士子如慈母如嚴師卽
縉紳先生無不翕然推服獨以食用淡薄有不自
愛之譏而府君動心忍性之學其得之平居素也

至丁丑閏八月甫一年三月而王父之訃至矣府君哀痛不欲生泣下皆血諸司道賻儀一切謝却卽日蓬跣就道止一敝簾圖書數帙而已去任日滿城流涕其以青天稱而長號以枳其輪者幾五十里至二載後而遍野謳思府君歸而塊處里中日肆力于古文詞及經世之學嘗設臯比口授不肖兄弟章句至戊寅十月復值王母之變王父亡後七閱月而王母病府君進藥餌必親必嘗病亟時不解衣者月餘不交睫者旬餘屬續之日惟附

棺附身是圖與上父合葬一循古禮人謂府君至性天成生事死事皆粹然真儒作用云庚辰離任二年五閱月矣中更撫臺復命者再按臺復命者一歲報季報獎譽如一日而耿中丞按君交章劾府君任性肆才應議處過堂日僉都劉紫山公思問曰本院嘗撫閩閩中宦者稔知之支司理才守卓卓且去任三載矣何例而黜之考功語塞遂以降閒重處之衆咸吁駭莫測所由說者曰府君嘗與耿中丞會于講肆中辯動靜之旨中丞偶爲

所困遂不相能又有疑府君觀政所擬疏事輔臣
微聞之而承奉者以此進又有疑府君過爭洪侍
郎事觸當道之所忌者又有疑府君過爭洪侍
學基爲一孝廉所侵卒力爲恢復後孝廉已舉制
科司理漳南遂從中相傾者府君皆不問而且耕
且讀于綠溪之野怡如也臬南籍紳憤起力爭間
復遺書相慰府君笑而不答惟嘗答大司馬吳自
湖書謂唐仲友守天台賑饑恤匱百度釐舉爲天
守第一而朱紫陽乃六上章擯之程伯淳如精

金美玉宜無可指而趙忬獨不相能則不特君子
小人勢如冰炭卽兩君子而軋于事勢狃于學術
因而相傾者多矣府君自是益淡居簡出凡七年
餘至癸未春冢宰寅所嚴公清知府君枉托所忠
強府君出府君俛就備江西布政司副理問故事
遷吏類不大大事事而府君飭躬秉憲不敢怠左轄
定宇馬公文煒大相重不欲以幕下禮延見促膝
商榷幾務至丙夜不徹也暇輒偕兩溪萬公見羅
李公思默萬公見麓蔡公究性命之奧一時故知

門人以千秋質政以聖學印可又翕然傾江右會
撫臺曹荔溪以京庫停俸而奉新縣逋獨多邑命
朱雲崢其年家子遷去不忍論列以府君與朱亦
同籍遂屬府君示篆相要徵舊逋必如期完府君
至縣見諸弊叢沓胥史猾桀不可理遂一切法諸
不法者然爲朱雲崢調護則不遺餘力邑有豪民
廖富九者橫于里府君收而置諸法廖遂糾前胥
史詣朱所譖府君朱因徧揭諸司而內從故掌院
趙麟陽求援趙以內戚故亦移書江右部使者欲

害府君時撫臺卽馬公定宇以左轄遷而按君孫
公許西咸知府君事委曲且府君署縣時所爲朱
調護者又熟耳而目之一時上下咸不直朱令而
稱府君爲長者然奉新士若民又時時泣詣兩臺
卽見麓蔡公襲溪余公洎諸鄉紳亦書請願以府
君宰奉新兩臺乃以疏薦府君宰奉新府君力
辭之不得至縣則務爲寬大崇學校獎士行敲朴
不事而訖于咸富邑故多盜烏山巡檢司捕影邀
功一切禁止不得肆自丈量後上下鄉均賦而南

北二區遂鞠爲茂艸矣府君酌四差襍編度稅以
三折一以二折一之法而兩鄉安大盜熊十二已
經二世積有饒資四方奔湊如歸丞尉以下蔑非
心腹也者府君悉其故時有以盜訟熊者府君責
之而繆爲好語曰熊十二鄉之素封卽二子聞亦
讀書奈何訟之熊自以府君無他心詰旦且備一
子詣縣訴渠污巖府君曰吾聞汝名熟矣且羈此
無還也遂盡出諸盜案熊竟輸服自熊獄成而地
方無犬吠矣奉新雖僻然與湖廣南贛隣大賓乘
傳駢沓勢如雷火府君裁以法不得肆而又以其
間供諸司文札之役遞至遞應卽庭鞠幽隱日凡
數十事對衆立揮于餘言邑士人錄以爲式不啻
左史也乙酉秋人林闈見兩士子卷文甚佳而以
字違格應貼府君遂立爲改竄皆中式不以語人
惟同事黃遂初嘗見而言之時府君賢聲又出江
右上而朱雲崢以前譖故日夜望之卽趙麟陽亦
爲朱以圖府君者不置冬入 覲兩臺知趙朱合
謀必陷府君預以揭白楊太宰述所由怒狀會察

日趙執筆有言楊太宰曰此官我素知其人賢者也幸貫之趙不能強亦註畱而會掌察事周御史希旦者則故安溪俞令姪戚且鄉同年也令復一載以敗墨而終疑府君中之周稔聞其言而甘心焉拾遺一疏竟入府君名議落職時咸以有才而不用有言而不校有恨而假手于人與居人位而代人報復無不爲府君憤者卽趙朱亦陰令所知造邸舍道故徐觀府君意而府君怡然無一言買騎南歸時有門人故知贖金三百金爲府君治裝

府君笑而却之曰諸君以僕居官而廉乎罷官而廉固在也洎遵 旨行勘而奉新士民群起稱枉自郡而司而院查覈無毫髮瑕政侍御孫公許西爲回咨甚具而府君之心迹白矣時有諷府君乘勘明可再出府君曰我自甲戌筮仕迄丙戌十二年教者一載司理十六月藩幕一載邑令十五月而幽居者乃七載有奇彼時尚不能委蛇以求榮今已半百矣安能碌碌爭此腐鼠乎丁亥冬遷于邑城西北隅時江南大饑死者如林府君設空所

以待枵腹者欲鬻身輒以數銖與之不責其券歲
熟輒遁去不問也所全活幾三百人曰吾力止于
斯聊盡吾心而已寧如世俗有所施輒欲聞之縣
官以市美名哉癸巳寧夏變常中丞心吾撫浙擬
特薦府君會中丞以調行遂下牒郡邑詳其事蹇
忬撫理齋以烏夷亂特揭冢宰司馬薦府君轄糧
廣寧竟以寡援不爲復府君亦浮雲視之弗是也
杜門寒兌故交非極厚者不得面弔慶事間有不
可已者命不肖輩代爲之邑令處惟元旦一投刺

外不復顧或聞事有極枉不平及關一邑利害者
卽奮身出援高坐縱譚引古質今動合典刑合邑
歎息傳誦旬月不衰也時兩臺及藩臬多府君同
年及故人卽有餽遺亦不令入于旄式廬之禮時
時不絕卒不一報謝自軒冕以至編氓咸以府君
簡貴所最慕文章節義之士千里猶神交也儉朴
絕俗不事修飾敝衣舊輿一二短褐蒼頭相隨見
權貴奉身而避若將浼焉優游林下者十九年而
僅一入郡城其諸游道絕不厝足人或以山水之

說進府君曰吾有簡編可當臥遊彼碌碌道途者
自謂領畧山水乎失之遠矣庭設講席日以文行
課不肖兄弟家素窶一裘一葛不數年不鶉結不
易也所居臥榻不蔽風雨風雨至拉擺聲不絕自
奉無兼味亦不盈盞卽遇客加一蔬聊以陶情而
已課不肖輩最嚴文稍進喜而餉以肉半盞曰讀
書不可乏滋味也至于麪生不令入口不肖輩至
弱冠未嘗衣絲縑先產故薄宦橐捥如又最恥借
交富家翁至于居間之事無敢啓齒故守株節用

僅免飢寒自五子五女婚嫁之後而生計蕭條不
可言矣乃憲友陸某者故而子弱府君力扶之嘗
賑其匱乏同年王某子逋鹽官倉儲幾三百京儲
二百有奇不償例且戍府君聞而奔告諸同年惟
丁公改亭力助之餘有應有不應者府君自稱貸
爲之經紀得不敗姪子某幼孤數遭齟齬府君嘗
任保孤遂委曲存濟之而族孽有誣府君嘗爲此
子寄私蓄者府君憤而直之城隍神不七日族孽
嘔血口稱奈何誣正人而死事伯兄最恭寒暑永

食歿而襄事皆曲爲經理伯兄有祖產售于人府
君辛苦復之不欲失先人意今諸子反以爲詞至
欲炙肉不肖兄弟者至慘時士子有未知名者府
君得其稿讀之輒延致西塾力爲揚詡卒以成名
及見一才一藝無不亟獎藉以吐氣者不知若而
人乃府君卒不任德甚且有背詆反噬迄今而下
斥不肖兄弟者矣朝夕愛獨立輒呼不肖兄弟訓
以古人法言懿行及可爲懲戒者娓娓千言嘗曰
吾生長患難自幼及壯日有三死焉幸不死而復

以文學起家卽產不及編戶名不出閭左然吾無
不釋然于茲也昔宗衍公五十弗子有良民誣于
盜掠服幾瘵死公憐而直之官得白已而攜艾妻
以謝宗衍公却走避之夜夢一神曰汝有隱德天
錫爾以文人爲子期而生蘧菴公以文章顯世而
菊岩槐谷兩公復以厚德培之予幸而仕卽仕不
顯要皆宗衍公一念基之也宗衍晚攜蘧菴于膝
曰吾願兒爲校官人異而詰之曰校官而才可以
及人不才不大害人今自蘧菴而菊岩而槐谷以

及予四世爲校官矣于宗衍公心不旣酬乎甲辰三月不肖下第府君日夜望不肖南旋二十二日不肖抵舍府君已有微恙然衣冠而出詢朝政及海內人物詞家臧否終不及一家事嗣後卽疾漸淡而容愈肅至四月十八日莫呼不肖等微諭以後事謂吾產薄甚柝箸後恐餽粥不給然惟廉可以立身惟儉可以成廉小子其以儉始繼語忠孝大節立身法度不肖輩流涕聽受嗣後漸不欲多語惟晨起及將莫必嚴坐俟不肖等候起居啜茗

而出始臥至廿日丙辰端坐將逝忽躍然曰俗忌夜亡姑需之至巳晷始瞑無私語無怛容嗚呼痛哉府君自幼迄莫年未嘗一日去書不讀未嘗一日親聲色玉帛之事在仕途未嘗以一文潤私家未嘗以赤蹠通京貴及歸山未嘗一問治生之術未嘗一與聞非義之習卽古之達人正土方且退舍而以寡交游剛腸惡惡不與世推移以故仕不顯卽名稱亦不能責之不知者惟逝後邑之人咸追念先達慕義好修謝絕干請不爲勢禦不爲利

動有疾苦枉抑必慷慨暴白咸曰支先生先生遊
而此道不可問矣則人心固自有公也議者謂府
君天性孝友至老猶孺慕祭祀必誠必敬似王休
徵屹屹好理學不妄交游一介不輕取與似程伯
子嫉邪秉義不善迎逢人意人有過輒面詰不能
容臨大節凜不可奪似汲長孺好學不倦工古文
詞睥睨當世似蘇長公憂世憤時慷慨論天下事
動中晏領毅然欲以身先天下之急似范希文檢
厲勤慎問饋必謹不事玩戲任瘁仗義似陶士行

抵掌談兵闔闢操縱視奸雄于股掌間似諸葛武
侯全真守幅率意徑情不喜習虛縲似嵇中散人
倫鑒識品題中綮處約味道不澄不擾似郭林宗
不立城府與人語洞示肺腑浮雲富貴芥視生死
曾無一塵入胸中似邵堯夫無過情焉所爲古文
詞少年喜做韓昌黎孝廉時從事性命之學議論
慷慨暢達至豫章遂一意步趨左氏歸山則鎔古
範今直逼漢魏而上詩五七言近體得老杜真髓
歌行絕句出入青蓮今將合刻以行惟編年一史

則私有所左袒者咸排之顧府君此書重節操而薄浮名獎文學而輕軒冕伸意氣而羞委蛇崇寔德而砥粉飾雖多風聞非敢臆斷具曠覽者自有公評溢惡之言恐未足據也先是間居時議鄉飲鄉賢事每感額曰有是哉俎豆之不如墦間也丈夫生不五鼎食死卽詣義黃姬孔割席談心奈何與販傭爭餽餉乎及與不肖兄弟詮次當代文章名家輒謂當得一言以誌我府君意在世味之外固如此敢撫述一二以請惟舉左氏品藻之法馬

遷祿寔之文俾隱耀潛光附青雲以有施焉獨恨哀痛如絞裁言不文願德懿行百不及一則不肖何所逃罪惟怍怍隱隱俟華袞以自贖耳府君生于嘉靖甲午年四月初一日子時卒于萬曆甲辰年四月廿一日巳時享年七十有一配嚴氏嘉興太學嚴公從節女子五長卽不肖如玉娶漳州府守曹景坡子太學位宇女次養訥邑庠生娶建昌府檢趙經野女先卒三如金邑庠生三試棘闈不偶以例貢入成均娶文學陳挺宇女皆我母李氏

出四如瓏國子生娶府廩生於瑞雲女顧氏出五
如增娶太學蔣建區女張氏出女六一嫁曹以庸
先卒一嫁廩生戈靖邦一嫁于時保皆嚴氏出一
嫁監生張夢龍母李氏出一嫁庠生卞玄極金氏
出一字廩生沈紹曾子楫張氏出孫男十二元素
邑庠生娶華亭尚寶司卿徐述齋女中約娶侍御
顧徽章長君太學見陶女允堅聘憲長陳穎亭長
君文學貴聞女皆知玉出朝弼國子生娶藩司都
事薛毅軒女養兩出元哲聘給諫葉鹿吳長君太
學孟蓋女中繪允灝如金出鴻祖鴻基如瓏出如
增出者三尚幼孫女一一嫁辛丑進士馮桂海子
國子生季鵬一嫁文學余省韋子秉正皆如玉出
曾孫一朝弼出卞巳年九月十一日寅時葬于
邑西律圩之新阡

三虞泣誄

不孝孤如金附贅

嗟乎嗟乎不孝孤自甲辰惟大故以來不覺偷視
息于天壤間亦歛然十有四禩所矣緣先府君尚

僑淺土宅兆有待故雖援琴後而隱隱瘋憂則常
若在復出者然歲時行棖率季弟尾家督從青烏
子于垓北蓋屋之區幾面鰲足跣而今始獲一杯
土哉駟鬣雖封蓼莪已蔚析薪而弗克荷象賢式
穀之謂何何以對在天之靈副重泉之望而申罔
極之報千萬一哉肆茲青箱具在手澤徒存而不
孝孤材孱品杓卽充賦濫竽數數逐槐黃之市而
迄未逢一售也暨病且廢計齒而踰立矣歲月如
駛明發不寐忍忘有懷幸名太史撫實錄以錫華
衮令岱宗有生氣而先府君不至奄奄同地下人
者皆其如椽方也藐諸不忘府君其敢忘如椽乎
爰從三虞之暇對揚識銘絮獻不能已已而踦爲
之誄

於維世澤代有聞人位不必顯道無不信五經而
後奕奕矜紳風推望族洵侈鄉評篤生府君天挺
其英蓼集于躬用玉其成孝友天至不畜憂羨倚
馬才雄電飛墨卿品純玉尺學富金籟髻而轟譽
旋聽鹿鳴數躋公車壯而蛟騰人倫泰嶽天衢福

星正色抵袂朝右畢傾黃矢丹鑣新以霜礪聯
相勗曰佐夷庚願言請劔脫彼羶腥楮挾風霜氣
愆江陵云不可使借鐸西征捧檄色喜鴻飛于冥
化雨仁風中吐菁菁量移泉李平反其刑弗畏疆
禦僕區得情雪蔀梧丘徹覆鵠亭醜爾墨吏奔駟
震驚司寇何辜羅以采苓誰操淑問而爲飢鷹一
官如蹤三尺是馮翊齟齬嬰樞裂背斷斷奉諱而還
含沙我乘漠不書空聽彼青蠅豫章舉幕叱馭而
行剝圭爲芥游刃有羸閉門却掃嚼菑飲冰鵬息

槍榆臺章交旌

帝命曰俞爾宰新城拔薤櫛垢

起壁攜盲陡釐束濕而格絞繩民歌來暮士仰淵
渟洞酌注茲適駿有聲直道陵遲狼噬頻仍三黜
五竅天軸誰擎民各有心截鐙攀鉏緊遺甘棠勿
剪勿零賣嗟展獲豈愧孫登歸賦十畝桑者駢盟
四壁圖史課兒篝燈虛白重玄刀圭一罌吟芬陶
謝文郁二京富矣十餘購之千珩坡雪寒松雅嗜
幽貞白眉獲雋方幅傳經洛下東山望重蒼生滄
海蜉蝣與世亡爭石藍可餌瓊芝可劔胡不憇遺

未耄而昇鳴虜痛哉榮名非馨亮節是馨卓哉府
君軼駕古今野有遺徽山高水清朝有遺摹信史
旂銘碣嶺玄耀炳如日升人亦有言雖死猶生烈
烈桓桓千萬斯齡卷裏風木結骨槌膺鳴虜痛哉

支華平先生集卷一

樵李 支大綸心易父 著

五言古詩

江幕有懷

寄迹紅蓮幕緬憶清旦閣江河雖云殊風景應相
若千峯入簾櫳淲流縈丹牒嘉木羅清陰好鳥遞
鳴躍白雲何英英和風互迴薄遷客寂無營奇抱
聊爾托翩翩水上鷗矯矯雲中鶴顧非謝幼輿雅
趣宜丘壑

懷舊

長至裴陀洞九日高士峯欣逢素心人聊復寄高
蹤振衣凌絕巖倚杖披蒙茸劇飲班蘿薜長嘯驚
蚪龍琪園熟丹荔綠沼秀芙蓉邁茲豐以豫露冕
故雍容良會苦不再黯然傷離悰舊游宛在目延
劍何繇从遐心憶金玉夢魂徒憧憧

昭君怨

念我二八初承恩入漢宮文憐班史續忠拒婕妤
熊自憐顏色麗顰笑生春風且訝相如賦安能賂
畫工疇知錢有神黃金解爲容丹青慘以淡重瞳
忽以矇不期天可汗乃識畫圖中和戎非所願緣
此發幽悰呈貌披香殿孔壬術甫窮賊賕紛委籍
陳尸西市中儘拚絕世姿爲王達四聰八千長門
侶從茲得上通稽首辭君王勿爲讒佞蒙

過河間口占寄丁勺玄十六韻

我從瀛海去君從瀛海來來者會有遠去者何時
回我去何所有空囊策駑駘泥滑行難進陰霾撥
不開敝服人爭席村酤自舉杯君來何所爲駿骨

千金臺薰風消積暑甘雨灑輕埃羽蓋催星騎珍
饌羅雲壘昔日調本同今何忽以乖我去非君意
君來感我懷我已甘瓠落而君定鼎台塞馬宵難
測海鷗閒不猜天人巧錯繆造化如嬰孩時有遇
不遇人非才不才把劍發長吟調悲聲正哀飛策
向南征陡覺雷霆催

經梅花道人故丘

寄傲華亭水幽齋徒四壁與世鮮所儔剛有梅花
癖晴窻展縑素香雪紛如積手揮玄理塵頭黠悟
禪石翛然高士踪遐哉弗可覲披圖訪故丘椽斗
委茅藉

七言古詩

行路難

行路難行路難吾嘗汎舟黯淡灘汎流飛瀑湧崩
湍寸步九折十礁礮喧歷歷震摧心肝顧我正冠
擊蘭漿一瞬百里帶笑看龜鼉揚鬚泳危瀾又嘗
縱步霹靂岩鳥道縈結石壁巉寨竅砧曲削萬仞
日光硤辟靄層嵌顧我肅趾厝其下曼歌長嘯和

英威猿猱戢首借飛颿桐鄉之山如培壘高不盈
咫尺平如砥桐鄉之水僅容舸涓涓瀝瀝清見底冠
裳揖遜通一刺睚眦俄坑二孝廉行路難行路難
不在人間水與山差岼澎湃笑談間鼃鼃懼駭不
敢過猿猱辟躩愁躋板行路難行路難智士聞之
心膽寒

功名難

若謂功名易渭水非熊頭白遇若謂功名難挾趙
攻燕指顧間吾今已年五十七前望子牙二十三
回顧甘卿四十五舊事淒涼那忍談崎嶇塗抹漫
一試四任紆回七品官素心秉直忤權奸含沙者
蜮紛來攢歷俸總贏三百石風波搖撼天迷漫責
我廉橐中十載無一錢責我慎履繩蹈準直如弦
責我勤戴星出入夜無眠責我仁糞糞不忍試蒲
鞭責我斲片言兩造疇稱寃人誠畏我方力持三
尺蕭王綱時或濟以員乃云意忌巧中藏人誠畏
我剛斬釘截鐵新刃芒時或濟以柔乃云玩世浪
沉浮匪獨權奸情叵測世途紆險盡山川林林金

紫諸貴人不知何術能鑽天挂冠歸來十五載困
窮拂鬱摧心肝青雲親故已削迹貧求貴妬日夜
謹或從虛空下一石或從笮井生波瀾百事俛從
不見德一事少異成仇敵百言調護了不聞一言
未契生蚤賊對面嬉怡膠與漆俄然轉眼翻荆棘
韋脂蹲沓喧不休老鈍逢之轉脇側衣單食糲苦
自甘呼馬呼牛俱等閒已分息機終匿影怕看冷
面與黧顏人云丐有三日運吾運通時無一瞬向
後流年知幾許子牙功名可勿論天覆無私吾命
偏世運多順叩不然前生孽債同深淵儘拚今生
取次填

結交行

古人結交惟結心今人結交惟結金金多驅鬼如
驅羊金盡交絕覆見侵古人結交惟尚義今人結
交惟重勢勢重咳唾生風雷勢去反戈相辟倪君
不見南隣子追隨談笑滿城市指天畫地同生死
一朝身去家復寒門外誰人厝一趾又不見東隣
有素封精鏹千金結巨公而今金盡交亦絕苑苑

誰復顧飛蓬老夫俠骨生來勁不向富兒通竇徑
胸中一掬玉壺冰眼底何曾問衰威曼聲長歌天
地閒世情袞袞如蒿萊

隣女行

南隣一女顏如花貞孝婉婉柔且嘉朝紉絲泉夜
漚麻荆布無媒空歲華北隣一女情性劣四行俱
無百事拙帝子王孫爭委禽祇緣綺繡盈幣篋東
隣有友自髫年貧窶出入相周還見我遇慳錢又
罄翻然借手爲墜淵青雲貴客在朔方水陸三千

阻且長有勢可援財可取問餽緘詞日夕忙人生
何必饒才貌人生何必修宿好人生何必顧清議
人生何必敦雅操不如相將柳陌與莊蹻左挾琬
弓右寶刀日剽行旅橐中裝夜發諸陵希世寶積
粟堆金滿倉度時捐纖粒濡涎沫松文皦白映玄
眸黃金火赤手可熱小靳嘻怡首盡摧一揮駭賜
腰應折頤指儕流如使狙名場利路機猶掇膩澤
滯朋膠漆堅餘腥千里爭奔蹶一丁不識致青雲
一事不解登津要吁嗟不獨結婚交友事事宜世

間何莫由斯道吁嗟世情真嶮戲吁嗟世道多顛
倒昨朝桃花似錦霞今朝零落隨芳艸花開蜂蝶
日紛拏花落閒庭空自埽阿誰初仕勢熏天厥子
而今成餓殍阿誰廣厦鎮垆郊俄然勢盡番爲沼
貪吏可爲不可爲惟有靈荷堪自持旋乾倒岳鎮
常靜風淨天空雲自移

春楊曲

城邊柳枝復如眠渡口花飛骨客船長條曉逐流
鶯語細蘂朝含玉塞煙無緣得解湘妃珮空有遊
絲挂春樹漢家苑外綠如纜西望長楊無覓處春
風淡蕩染羅衣公子幽嫺玉騎飛清平多少豪華
事落日悲笳郎自持一年一度花如雪一變一回
情轉別雒陽季少笑幃生獨向金門思如結春隄
紫陌總芳年綠墊清尊意了然自對門前五株樹
朝朝暮暮使人憐

課耕苦旱

我有瘠田三十畝墳墟磽确世所恟年來佃者故
無賴租徵爛豈不盈斗國稅繁急尚難輸那有歲

餘供八口憤思振起積衰時服牛布糞勤畦穰
胼胝拮据親督饁確擬穰登儲宿糗無奈天公巧
簸弄旱魃煽虐苦相負驕陽閃爍熾于火猛風捲水
聲作吼人疲牛勑力不前龜拆苗槁勢殊陡庾內
粟罄常晏炊浜中水涸徒掘溝從歲儲粟粟不售
今歲粟慳無處叩追思半生寓寓內立名營利事
事揅我計圖南遇反北旋圖向左機忽右伶俜荏
苒已至斯升斗營謀亦掣肘呼天禱地總茫然空
揮涕泗椎胸剖嘗聞居高解聽卑倘垂睿鑑矜窮
窶須臾霈澤下塵寰五龍倏忽齊驤首蟻封穴戶
石燕飛河伯翻流雨師趣銀漢直寫如建瓴大者
傾盆小傾缶我屋見天常苦漏丙夜牀牀聲徹丑
披簑戴笠裹書囊仰謝蒼蒼徼福厚四郊枯槁盡
敷榮三農獲望我何有

雪中候藩伯萬襟宇臬使鄒文谷二同年

雪花紛飛大于掌寒風撲面威如鋌野夫高臥太
無端瘦馬馳驅候行仗口膠膚粟肩侶撼笑語雖
溫心怏怏何似党家風味麤玉人美酒羅銀幌

得子

吾父笈年三十六生我鞠我如珠璣吾今亦季三
十六吾兒呱呱始生育念我生不辰勞形苦趨趨
擷蘭珮芷千秋芳挾微探祕三冬足荏苒流年忽
若斯萬事偃蹇舟移陸向來志氣欲橫秋翻與蝸
蜒相角逐追惟疇笈父母心豈至斯乎良可慙吾
兒肖形得似無共期老蚌含明珠吾心亦是吾父
心顧爾復爾懸柔弧崢嶸應作千里駒勿與爾父
同圈模耿耿向南圖浩氣四海驅熠熠升天衢坐
理泰階符不數杜家驥子扶不數楊兒解潛夫作
棟須支宇宙傾爲霖好濟蒼生枯癘人求火良自
憐芝蘭玉樹要使榮塔前

癸巳閏東征邸報

狂倭之勢如轟雷破浪衝風動地來樓船百丈帆
插天戈矛耀日聲喧虓鬼行魑伏計百出猴跳猿
攀震羽毳騰身直上發颯敵爭先死鬪無旋回武
弁望風膽迸裂勇士覩影心崩摧笈年汪直已如
許況迺關白尤渠魁可憐趙括易言兵長平坑卒

成血軀古來將將重分閫只今誰是謝玄才

贈邑令

武塘日暖波溶溶武塘芳杜搖春風紅樓翠箔十
萬戶連雲掩霧江西東輕舟曉蕩遠山碧霜刀暮
贈金鱗紅平疇老農力新雨別浦漁子歌長空民
殷俗厚重犯法自古此隆稱敦蒙 天王御極宣

重光敷文海宇扶天常王多吉士四國康蠹爾城
狐尚跳梁 天王獻聖照遐陬爰簡吾侯紆墨綬
驅車蹙駐渤海濱牛刀小試陰陽手自公令此餘

五年提封皞皞皆堯天詩書窻戶夜宿火犁鉏畎
畝朝衙煙燹倫講幄敞高堂青衿環聽森成行披
霜流汗分毫芒閭幽窮噴聲琅琅節聳胥山巔清
逼武塘水碧雲漠漠接三台素練平舖照千里人
云我公善樹莠妙相天工若生意養成犀刃斲七
重植我甘棠還菽華

倩園詠爲曹位宇題

干溪之澣清且淡中有佳岡占玄津風雨無端久
饗蝕曹君市取更鼎新薙荒翦棘闢幽徑崇高卑

庫排朱板迴岡斗轉虹蜺合杳嶺雲屯日月跋縹
艸丹蘅錯綺繪沙禽水獸印花茵卸砌蒼森攢秀
木飛薨蒼蔚遠脩筠賸見蟠枝紉古篆更沿縈洛
摘神輪浮巒積翠紛圍溢河英岳粹何嶙峋吾聞
銅陵鈇觀處卓固金谷徽音非季倫平泉醒酒石
何在麋鹿蘇臺迹已陳翩翩濁世佳公子掘倩擿
鮮娛芳辰應達浮齡了如借不惜黃金布地堊榛
藜弗艸再生色碧蘿喬木重含春余從脫鞅歸故
山爲愴澆俗來城閭兒婦書舍苦湫隘謀貸子錢

營隱蓄余聳呼兒重帖囁湍水何曾解縱鱗不見
禾城太宰秩亦尊假園臬使宴私賓爲憐一朵姚
黃花炎炎鼎族成灰塵又不見奉新徐太學園池
畜彘肥且珍沈令徵之不及申須臾涸鮒如其身
只今吾邑感侍御園具紛紜隄鬼薪画船奔命少
迤逗王令咆哮誅反唇宮鄰金虎勢崩摧那有桃
源可避秦曹君之圃真杳窳吾欲從之絕世民飢
餌丹沙渴沆漉朝騎玄鶴暮蒼麟揮毫碧漢走龍
蛇縱飲滄海爲醪醇長唵時擊漸離筑怒喝風生

朱亥嗔逆旅何煩更築舍寄寄那知夢與真

暑月途中

赤燄蒸骨汗如浴黃塵蒙蒙迷倦目空腹奔歸賣
酒家數米炊來貴于玉力倦神疲眠未穩蕭蕭征
騎催聲促去年此日小齋中火道清泉萬竿竹科
頭獨踞琅玕簟一枕涼風睡初熟

五言律詩

廷試感述

上國春光早彤廷曉日新明良千古會燈火十季

心策入重瞳簡袍分玉府珍丹衷期報 王白髮

況思親

山房叢蘭下初啜新茗

陶椽瑩如雪嘉茗挹新意幽卉當時發清香滿座
生林暉迴霽色山境斷凡情獨此冥心賞冷然坐
化城

春日贈圃者

曰余何所事藝圃在南城春色敷千植欣榮接四
楹悠然刪卉罷散步踏花行莫說趣迷濟無能問

耦耕

雪夜在豫章公署

南州淹吏隱東閣
啓重暉雪剝梅枝瘦
風欺酒力微
睠茲鑽蠹竹
瞥爾見垂衣
早晚論封禪
何因一奮飛

感賦

金多身可售
金盡背旋違
瞬息分雙戚
眉峯隱械機
口甘千釀蜜
腹甲幾重圍
任是逃虛侶
難逃蠅箭飛

己卯仲冬先公服闋哀不忍釋志戚

嚴父恩何極
孤兒命獨窮
猶傳庭內訓
難息樹間風
黯黯魂消盡
奄奄服制終
除線心曷忍
情豈世人同

辛巳仲春先妣服闋志哀

慈母思難報
孤兒命轉窮
幾年機欲斷
三載服俄終
夢裏愁容黑
燈前淚血紅
除線心更苦
情豈世人同

壽卞母吳夫人

卞母秉節持家訓子七十年午月十月初
度令子太華心穎持觴壽之薦紳先生咸
播諸詩歌以侈其盛予惟子之願望其親
者曰壽曰康而親之屬其子則曰賢曰顯
賢且顯矣匪壽而康安所效之然弗賢弗
顯卽壽康弗樂卞母老矣諸所屬其子者
弗克自致而致之壽而康而樂者匪二君
誰屬哉余亦有子余亦有心故頌而以規
云

纓續千絲綵萸開十葉新華冠猶賸翟玄鬢已堆
銀饌鯉情須竭丸熊味獨真應知叱馭者絕勝舞
斑人

寶應湖遇風

寶應一勺水剛于逐客偏暴風能震地惡浪乃掀
天沽酒唵方壯危襟坐正安平生忠敬在到處自
飄然

余幼同庠丁清吾別來二十五稔矣歲午日
逅于邑庭駭余顏貌勝少年詢駐顏之術

賦答二首

風塵三十載玄髮故相仍
楓老丹應豔松寒翠更
凝澄江千頃碧素月一壺冰
戰勝何須問冥心入
大乘

其二

落拓忘家旅蕭疎有髮僧
一真遊化境萬卷續前
燈塵世漚生海浮榮水作冰
無端貧病老何事得
相凌

三賢祠失足

積雨蒼苔滑奔趨陡失容
低頭知己熟屈膝苦無
從折屐誰傳遽扶筇孰奏功
漫云增一識畏路正
憧憧

秋夜懷龔郡伯

秋仲月輪新清光欲襲人
微吟聊却病殘卷自忘
貧獨有錫山水偏甦涸轍
鱗楓灣應落葉飛夢自
相親

持志逆境

瘦腹渾欲折茅舍半無楮
四壁山如削終風雨更

醜餓豺當戶踞毒蟒遶簷馳孤坐殘燈燼天君安
所持

順境

漏永燕居時香奩出艷姿良金豐密篚醲釀薦瓊
卮爵秩從心授恩讐快爾私惺惺乎闕主此際作
何持

人情趨利避害剝恢錙銖曲殫機械試從逆境
中身處之當作何狀爲之賦逆境而宴安易溺
逸欲難充矧當莫夜諸幻見前熏心動魄酷于
號毒吾人揮塵高談輒云克己不知當此景能
自持否孔顏云逝寧歆亦罕孤陋索居誰爲鍼
砭念之惕然并賦順境云

老僧

苦海渾無岸慈航渡尚遙側身疑斲木回首失霜
瓢眼暈天花字鬚霏玉屑刀腰欹膜拜怯齒豁偈
聲嘈

袁四參謀遼左效杜體賦懷二首

不見袁生久羈危真可哀沉幾稱先物索隱擅琦

才繪藻人爭妬譚兵世益猜途窮頭更白遮莫賦
歸來

其二

黃也今何在遼師久未聞紅顏猶忤俗白髮況從
軍對月頻中酒挑燈重校文生平高誼在目斷海
東雲

肺病

余肺病源自外氏歲發秋仲緣少年鄉舉
不偶也發必于五更得茶則愈緣夜讀依
月冒寒也甲子舉于鄉則病在夏緣南省
久困也甲戌成進士不復發丁丑秋邁外
艱戊寅秋邁內艱兩罹哀慟復發于秋每
歲一發不爽晷度

肺病亦多奇幽尋若可期悲秋隨落木早起先晨
曦天籟靜中發星河坐處移烟凝茶鼎熱心爽夜
忘疲

長谷沈瑞峯文學七袞矣而令子修吾爲吾
庠白眉于其誕也輒致慰藉云

長谷挺靈椿蒼烟翠色春
夥頤麟紱旦爛矣鳳毛
敗道爲尊生緇文因教子
新長楊行奏捷頻進尚
方珍

撥悶

瓜期今已及辟召幾時來
道在官寧左才疎命豈
乖夢疑隔世事愁入五更
懷已得虛舟意臧倉莫
浪猜

壬午一令以請托得薦感賦

皎月當空戶涼颼總畏人
鞞圖寧賦詐仕路只憂
貧丸就蟻螂化螢生腐艸
新天人多繆巧滄海忽
揚塵

支華平先生集卷一

支華平先生集卷二

樵李

支大綸心易父

著

七言律詩

陪宴新進士志感

瓊筵此日醉神仙把酒臨風一愴然
直道已當三黜後浮名猶記十年前
心懸赤日愁沙域目斷孤雲泣杜鵑
傳語故人休下石半生燈火總堪憐

龜思

彈指浮光五十三秋容不減少
年繁半生瓠落夢

初覺二月鶯花興易闌任彼紅塵摧玉質饒子綠
髮駐金丹碧蘿如幄川如繡盡日支頤仔細看

東同年李編修

翩翩使節駐江東遷史文章百代雄漫憶當年曾
附驥却憐吾技似屠龍空彈馮缺悲無主擬試齊
牟媿未工此日玉堂多雅調好憑鴻翼墜天風

及人以詩促余謁選用韻荅之二首

秋潦乘河苦急流蘆汀片葉任虛舟息機久矣消
搖臥玩世俄然汗漫遊畏路交情誰管鮑故鄉詩
社逼應劉蓼風蘋月涼如洗肯向迷津一問否

其二

仗劍高歌對綺筵綠觴素蟻挾飛仙壯遊總得江
山助念別寧爲兒女憐習習涼颼吹客鬢翩翩逸
興薄秋天浮踪已共盟鷗狎沙渚從君喚晝眠

九日遊柳洲亭三首

夜夢伍相在顧言忠楚報吳甚悉領聯乃

夢中句也

伍相英魂何處尋伍唐隄畔柳陰陰渙舟未解西

江劔一飯空投下瀨金都都故畱忠楚計無疆終
殞報吳心英雄幾掬恩雙淚夜夜風濤自古今

其二

貫酒狂歌鼓柁遊憑高縹緲躡層樓耶溪尤物鷲
花老石室遺逋日夜愁入郢漫酬無忌恨使齊畚
墮伯嚭謀可憐隄右千株柳猶帶寒鴉訴屬鏤

其三

一榻清風午夢賒忠魂炯炯御廳車耀兵魏水唐
稱伍試劔璋山石有赧抉眼吳門真作沼回頭宗
國竟無家鬢鬢素髮凌飛絮日日溪頭捲莫沙

春日在豫章公署

當年捧檄出長安盡道愚夫愛冷官雙膝到今渾
作繭寸心如笈漫成丹幾回顧影頻舒氣畢竟逢
人又強顏苜蓿已空匱已破會看春燕一彈冠

肅皇中興聖政比隆三代俗儒方之漢武謬
矣于其登遐哀志之

鼎成龍駕杳難迴過密應深四海哀神武真堪清
瀚海遺謨原自悔輪臺只聞李豎合嬌死

終嘉靖
世宦宦

不得逞一埽正德驕縱之不見田蚡請宅來外戚

故視李延年專寵者何如權臣相繼誅滅視田蚡請宅者何如四十六年真聖澤微材猶及荷培

栽臣生也晚乃以皇上壽考得舉于四十三年

秋溪旅懷時在南昌公署

屈指官期已及瓜那堪搔首對烏紗西山爽氣呈新牘南浦潮聲報晚衙江月夜寒籠臥遠薊門秋杪雁來賒如何假寐長檠下倦眼朦朧見翠華

部試午日賜扇三首

律轉南薰傳午漏恩銜鳳嘴動涼颼冰紈沁出披香殿寶月光分太液池影入霞觴搖錦席綵綠金縷拂朱旗熙朝懿典由來盛願播仁風滿四陲

其二

堯甸清涼午漏遲欣逢佳節被恩私曾聞酷暑題茶肆忽奉薰風下玉墀炎冷不須悲歲序卷舒常恐負明時莫云微薄終難展已許捐軀効一麾

其三

朱旗斗轉午陰長珍扇傳宣出上方巧斲湘筠寒映玉規裁蜀繭夏含霜自憐弱質同披拂賸有仁

風爲奉揚却憶重闈當暮景幾回昏清待黃昏

歲旦臥病

僵臥空齋雪亂飄梁園何暇候蜂朝官家原不嫌
強項傲吏由來嬾折腰度歲祇應饒藥物謀身故
自媿渙樵年來已識虛舟意浪說陳登苦似驕

送南昌樊學博遷洛容令二首

春風聯轡挹清暉新命俄驚夙願違伯起徵時三
鱸兆伏波到處百蠻歸青氈未敝春逾暖杏樹移
栽花更肥從此宗元文自好莫言內地柳州非

其二

偶逢楚客說蠻荒萬里離愁一倍長嵐桂香迷嵐
霧黑嶺薇花映嶺雲黃向來百粵文身地此去中
牟駟雅鄉利器正須盤錯試莫令經術負明光

候謁有感

首披凍雪膝沾泥蒲伏車傍轡再移畱滯故應常
落魄崢嶸無那獨雌羈却憐櫪馬心千里翻愧鶴
鷁足一枝會把卞和三日血叩闈直達武王知

送許侍御白塘還朝四首

許舊爲吾邑令

彩鷁翩翩泛錦湍乘風無路涕汎瀾操觚久已輕
司馬仗劔俄看踏賀蘭時有虜警鏡裏勲名雙鬢綠鼎
中龍虎寸心丹河東賦就憑誰薦送別惟彈貢氏
冠

其二

花縣棠陰滿岸湍袁安偃卧助清澗貧慙雪下曾
遺蒜冷向秋來獨佩蘭眼厭風塵翻作白心經燈
火煉成丹長喙不盡揆天巧一任人嗤大市冠

其三

一葉西風泛遠湍野人追送竭情瀾尋常抵掌籌
前筮潦倒停杯賦木蘭別浦波清萍尚綠平林秋
杪槿如丹杞人憂國渾無補珍重清朝鐵柱冠

其四

君德如山障激湍我心如水不生瀾燕臺會市千
金馬幽谷時含九畹蘭長孺阜囊行吐白子雲華
轂可能丹憐君那得從君去徒抱經綸戴鶡冠

壽同年貢洪沙尊公

累朝甲第傳金馬榮壽重光倚玉鑿義飲向來懷

白壁錦衣歸去舞萊斑南湖水綠春杯滿疊嶂風
清暮景閒三百鴛行同結綬知君此日再彈冠

南

豐嶂樓宜
之勝跡

辛未北上春試二首

幽澗寒崖久索居束裝北上意何如半肩行李天
人策一統經綸咫尺書河朔款戎須有日江南輸
粟竟無餘驅馳欲効生平學誰信長沙術不疎

其二

彈鋏長驅縱所如五雲深處是宸居十年鉛槧三
都賦一襲衣裘萬卷書文徵華國卿雲見運際中
興化日舒阿世自來慚曲學對君唯願戒衣袵

送同年蕭如齋守秦州二首

薊門秋杪碧雲霏送遠那堪挽轡吟禁闥有懷同
補袞江皋無奈獨分襟西曹素吏愁方劇南國蒼
生望正深安定千年風教在佇看俎豆接棠陰

泰

故有胡
安定祠

其二

翩翩使節擁春明珍重仙郎自此行五馬專城煩

出守六曹粉署獨知名曾聞澤國魚羹美幾見江
雲蜃閣晴莫負漢廷推轂意邇來循吏盡公卿

試士懷冊詩以諭之二首

獨望天闈倚劔歌清時願彥育菁莪若教衣錦嬰
三木寧似掀髯卧一簑萬卷讀來憐我老片章攜
去奈君何可知藝匠無憑據珍重祥鸞避網羅

其二

聞道長安春色新盡攜猿鶴出山林胸藏素冊原
無術頭點朱衣別有神東閣未開常委命齊郊厲
禁只悲人爰書并附嗟何及愁絕重闈夢裏身

郡伯方初菴陳豫吾招餞不赴書謝

弱羽傷弓尚未乾勁風吹起向長安宦情雞肋年
來淡世路羊腸到處難殘局自知先着少瘦腰剛
喜得官閒吟聲散憐秋容苦并作泉南一道寒

九日

亂插茱萸兩鬢疎清秋佳景入吾廬笙簧細細空
林樹珠玉粼粼滿架書夢裏彩雲時變幻醉來明
月幾盈虛登高便覺長安近況是前星啓曜初

時報

皇子
生

皇子生大赦

興都啓祚瑞應河清 世宗以丁卯八月
十日生享國四十六年近古所未有 今
上八月十七日生而 皇子之生以壬午
八月十一日未時此國祚永遠之符也

河清啓祚仲秋初三見垂虹衍慶餘舞抃一時瞻
國本靈長萬禩裕皇儲青衣喜集承明筆赤尾行
甦澗轍魚樵悴只今惟下邑彩鸞銜詔莫紆徐

祠部許仲葵入京迂途枉顧夜談

木槿疎籬曲徑中卧來五見放新紅流光冉冉三
夏月春夢蕭蕭兩袖風國事未酬家計落新懷欲
話舊交空多君夜半迂蘭楫把劔高談氣尚雄

門人李心湖促予謁選咏謝

緘魚千里托驪歌無奈幽情遠薜蘿乳燕欲飛嫌
翻短渚蓮纔放畏風多消埃猶抱孤忠在薑桂難
調衆口和清旦閣前朝雨後新篁浮翠水層波

風變

壬午七月十三日毒龍礮轟天怒時颶風四作海
暴溢闔市一洗山旋移惡聲咆哮乳虎嘯穢氛噴
薄蒼鷹馳漁郎任久解占候未午收竿猶恨遲

如玉兒邑試勉示

髻年論秀忝時名此日掄材見後生老去屠龍空
有術夢來覆鹿忽無評歌成郢里還同調賦入長
楊好嗣聲漢世只今方好少才華須似洛陽英

題月湖漁隱卷

大海東頭湖水寬平蕪森森釣舟還放開老眼浮
雲外領取清光落照間劇飲浩歌千頃足淡烟疎
雨半竿閒年來坐徹磯頭石却笑蓬萊只一山

送石屏戈壻應舉

午槐垂穗桂風清珍重時髦此日行萬里經綸宜
綠鬢十年燈火慰蒼生邊陲靡靡氛初動閭左蕭
蕭柝自鳴

時省城兵
民二變

側席只今勞睿慮北轅蚤擬

聽雷聲

中秋陰雨

中秋萬里共陰晴不奈風霾向此生玉宇祇應隨

翟手南樓那復寄庾情太空無滓寧須點老我何
辜獨坐清今夜儘拚沉晦處微玄終借一輪明

同年金令尹約賞中秋值雨

千里襟期共月明無端陰靄陡然生人間故是多
番覆天上何由辨濁清幾見參辰隨斗轉從教瓦
釜自雷鳴良宵一晤猶緣薄浪說聯鑣走玉京

丁丑中秋憂歸五載矣良宵對月懷我二人

每增涕淚

子夜清光沁骨寒邇來無復奉餘歡獨于石竇和
愁卧五向中庭帶淚看青桂影中銀闕迴卿雲擁
處玉人單清虛已識天閣近幾欲凌風愧羽翰

感秋闈傲言

憶筓憑虛入廣寒揚眉瞬目騁雕鞍舞時手握姿
婆樹醉後胸吞白玉盤南去北來雙劍紫東塗西
抹寸心丹因風報取蟾蜍信廿載蹉跎只一官

清旦閣秋思

清旦閣前竹籬披清旦閣中人栖遲風湍撼竹節
逾勁貧病摧人心不移林葉無言時序改畏途多

擄資據城計予六月二十日抵郡尚未履任而飛報星流道府官惶怖無策予曰小人困于水火遂作此狀誠得寬仁長者扶義而西宜自定耳毋事張皇毋煩兵革諸司曰無以逾公予慨然任之一日發二十牌諭以除暴安民之意小民爭先赴愬有若更生予一一剖之凡二日聽訟五十餘無不帖服者而許令若干道使即檄兵一百名護之出疆懷資無虞一時事濟法正官民俱安今反以爲詞耶安溪令俞仲章其積聲甚于許令兩臺下牒拘訊予亦曲爲瓦全感二年而仲章始敗褫職以去乃以予初訊詞色過厲騰謗都下其姻戚御史周希旦丙戌掌察事撫拾浮詞紀予落職又泉中巨豪被盜徃徃多張虛數以竊爲強唆陷良民捲其資產不問真偽官置其罪其計穢首鼠持兩端經數歲淹禁不決予以洗冤澤竹爲已任慨然剖之不少假借故上人聞有怨者天道有知能無活人之報乎乃論章云無益大時也序委過爲疎放人命至重鬼神難欺各宜猛省

展季自無

三黜恨臧倉猶撰後喪疑

先君以八月二十九日下世閏八月初三日告

縣起文計至是年閏八月二十日也自嘉善至泉水萬漳馬以計至是年閏八月二十日也自嘉善至泉水陸二千五百里入以二十一日行自泉至漳凡五驛以一日一文行計至是年閏八月二十日也自嘉善至泉水非惟無天理也且不知地用其律不文三十里者限半年非明也且不知地用其律不文三十里者限

聞謗

癘風沙影鳩爲媒白日清朝見怪哉積矢儘拚塗
尺璧孤丹忍使變寒灰縱云赤子心堪昧不道青
天眼會開忠直委身無二志從教百折可能回

自訟

憂歸蒙謫謫官幽居坐爲墨吏所窘悶懣
無聊自訟徃愆

誤承簡命入榕林聖主新恩十月溪嶺表馳驅憐
綠鬢海隅鰥寡兄丹心淒風刮地白雲散戾靄漫
天紅日陰彈鋏歸來惟有劒笑人紆紫更簾金

慰泉南故知

余甲戌夏觀政刑曹時張江陵上蓮花白
燕子擬奏劾之疏成擇譴書者于市簡亭

弟偵知之奔諫曰渠方有時名言之徒取
禍遽奪疏艸以去俄而故太傅豫所呂師
亦知之怒且咤曰纔得寸進輒敢作死且
勢在疑逼顧不重傷我耶予謝不敢未幾
張稍稍聞之疑甚師思予惟奇禍欲爲圖
歸以免于時出差告病咸有厲禁乃緩爲
調護得陳乞南昌教授以行旣一載撫臺
震厓楊公猥薦余故事學博得薦者遷京
秩乃予獨轉推泉郡泉巖郡也屬有司寇

洪芳洲素隙于張張授意當事者而甘心
焉余力爭事寢而張益恨矣予既憂歸三
載共事諸公散去殆盡而承奉者日事齟
齟予按羅甚悉幸無詞以乘泉中縉紳憤
然起爭之而門人李克蒼鄭子讀以書抵
予令善爲計可謂愛我未可謂知我也咏
此答之

千秋青史定難移照膽天明未易欺榮謝一生愁
裏悟風波兩眼夢中危建江哀淚添新漲燕谷春
陽發舊枝官是強名身是寄只教清夜寸心知

送馮濟之與如玉兒畿省應試

喜逢簪盍共論文獻策那堪兩地分世德陪京鸞
掖重先有詩人雄才肯嶺雁行翁吳維見掄魁竝
折三秋桂臚唱行看五色雲水上去人天上喜好
將佳信蚤相聞

中繩二首

薄遊兩度寄洪州纔到中秋已殢愁倦耳似聞滕
閣宴枯腸只向藻園按東封玉冊憑誰草西域金

戈孰與收長策莫如當月坐不將前箸倩人籌

其二

二十秋前此夜遊才華偏不讓名流
唵成陡落三十字醉後仍添八百籌
馬上奇功羞絳灌隆中高臥夢伊周
月宮似有人堪語笑問狂言幾日酬

勉玉兒應舉

奇樹中庭慰冷官長風吹信遠承歡他山攻就售
時易畏路爭驅試步難飛夢已隨鵬翮遠縈情頻
祝馬蹄安舊榻叢桂香猶在花趁秋期着意看

泉中同張運長陸二守熊三守遊清源山二

首

振衣千仞見瀛寰共陟泉南第一山
日射澄江環警蹀雲移疊嶂護禪關
游魚結隊情偏狎飛鳥忘機意自閒
行樂不教虛勝地歌鐘滿路使君還

其二

翠微雲木鬱蒼蒼風御泠泠到上方
千里峯巒開霽色萬家煙靄帶斜陽
清時自適登臨興浮世空驚歲序忙
最愛蛻巖依絕壁一龕燈火接天堂

甲午勉玉兒應試南畿

花甲兩回聽鹿鳴

先會大父及金皆以甲科中式

願乘甲榜再蜚

聲書貽萬卷汝能讀賦就三都名可成萊舞宮袍
酬素景梅和羨出慰蒼生孤忠爲我傾餘瀝莫遣

江湖負聖明

大兒下第倚問盼歸

四度看花四度新開門五柳靜中春歸來綠筆天
南色別去黃金冀北身奇字豈終虛屈指浮名何
必費含顰阿翁賸有青箱在倚杖吹藜好細論

七夕

賸憐曼倩落人間秋色蕭條兩鬢斑夢斷紅雲生
漢署醉餘明月滿吳山玄經草就憑誰解白雪歌
來只自刪聞道銀河牛渚遠星槎隱映可能攀

讀杜集

乙未秋章令君征舊稅頗嚴

賀蘭遼海足干戈江左那堪苦備倭煨芋已消三
日火叩扉猶督十年逋醫瘡儘剜胸頭肉染指爭
摧餓殍膚信道杜陵詩是史石壕哀怨遍山阿

答門人李玄冲進士

憶從慷慨致身初，萬死酬恩不願餘。此去播遷明
主惠，古來貧賤勢交疎。自知性拙難諧俗，敢謂官
閒好著書。瘦馬空囊千里道，那堪翹首望宸居。

初度

四月一日逢弧日，五十三年矍鑠年。對鏡自憐饒
綠鬢，挑燈賸喜續丹鉛。浮雲聚散天無意，丘壑夷
猶地有仙。獨愧劬勞渾未報，瓶罍時頌匪莪篇。

輓徐志山四首

蒿萊一陌幾昏黃，煙雨蕭蕭冷北堂。身後無兒憐
伯道，閨中有婦似共姜。臨風忽漫藏犀塵，落月猶
疑滿屋梁。此夕共終舟壑寄，無勞死爰憶山陽。

其二

久推粹質子淵徒，豈謂天年亦竝驅。塵世勛名猶
沙漠，重玄果報定虛無。飄殘萱艸千莖雪，揉盡瓊
花萬顆珠。爲問螟蛉何所肖，一杯他日尚堪虞。

其三

校藝追隨十載中，君年弱冠我髫童。自誇貴賤交
情見，祇爲金蘭臭味同。塵劫有涯悲逝水，花期無

信恨飄風寒燈兩夜瞻思處千仞岡頭雪後松

其四

慧質相期穎脫囊龍泉奚事忽收光死生意氣傾
今古江漢交情孰短長執袂頻年常屬句尋花何
日更稱觴旱雷共訝如生鐵此夕因君竟滿眶

促袁坤儀志徐節婦

明修邑乘

逝矣徐君四十年當昔袁丈亦周旋余慚挂劔吳
公子誰爲鳴琴顧彥先傳世故無蘭玉種遺芳今
有柏舟篇左狐幸得雷陳在華袞還勞慰九泉

促志徐節婦不得詠歎三首

知君馳逐正蒼黃老我空遺札十行交隔重泉寒
管鮑書傳通國漏鴻光智昏暮夜情如水議凜陽
秋舌有霜魯史原非禱枕比忍教冰檠獨埋芳

其二

奇節翻从死爰凝生前膠漆棄如遺不侵然諾肝
腸許忽中膏肓面目移竹策竟貽青塚恨梅花長
負素心期夜臺旦莫同歸去便說思君亦忸怩

其三

柔兆維申歲氣乖赤雲吐燄捲氛霾虛名見價錢
堪市朽骨誰知價可諧蕪穢幾編先積蝨縱橫十
道盡當豺世人殖貨酣無狀只恐浮生亦有涯

邸迺管嶰谷

羽管以令尹左遷密雲尉

逆旅驚心思正紛那堪淪落又逢君相將貰酒歌
燕市遮莫揮鞭靖楚氛泣盡鮫珠渾未吐別窮和
壁尚難分夜窻共說天涯路纔到關情不忍聞

丁酉秋有非意之謗

世事無端詎可惡行藏那恃直如繩幾看背井波

卽境

餞徑惟爭一着先淳芬李赤各紛然裝成伎倆無
虛日看到兒孫始見天鳩力無營身苦絀蝸涎有
限壁空綠霜青漆盡寒潭澗笑問浮生更幾年

邑令七年考滿投贈

聖王新恩踰地節璽書畱任寵文翁大樟七載奇
材見徹棘三回冀足空題處縹緗頻滿帙栽來桃
李幾成叢于今海島烽烟急吾邑跋跋可卽戎

送吳自湖司馬督漕

自管真儒賴爽邦傳家千鎔氣橫江市開西北虛
投餌橈發東南幾換腔高窳湖平隄已決徐邳河
激勢將降於今須信兵農合白粲齊教護碧幢

支華平先生集卷二

支華平先生集卷三

樵李 支大綸心易父 著

七言律詩

謝門人陳樂菴侍御序述餘

三支族望管稱賢萍梗江南二百年八世青箱猶
蹕蹕九朝宦轍盡屯遭憐余渡落難繩武藉子吹
噓得浪傳馨案莫愁無潤筆千金何處買如椽

如玉兒秋捷

差池半百毓藍田忽覲成名意惘然夢入彤雲憐

綠鬢喜從丹桂憶青年未論世德行將大且見書
香得少延薄分生平無一偶倘徼蔗境藉餘甘

生第五兒如瓊

翩翩諸子藹庭除課業含飴總發舒齒似商瞿茲
較晚貧如元亮獨耽書鳩居任自無三頃燕翼饒
予足五車假我從今知幾歲好持忠孝荷經鋤

初度

華髮文章一卷經曉逢初度愧餘齡幾從按劍投
明月浪向偷桃識歲星金盞自誇心尚赤客來誰

見眼堪青芝蘭風氣駸駸上詩禮翩躚屬過庭

題唐伯虎美人夜妝圖

玉人丙夜倚妝樓一握青絲萬斛秋鸞鏡晤來添
別恨鳳釵排處半嬌羞雲堆螺黛坐山聚光徹銀
缸碧漢流皓質娟娟蟾魄淨陽臺幽夢倩誰收

壽馮文學五十

秋日秋江景物新大馮君調好誰倫季當服政名
猶屈學到知非見始真慷慨荆山懷璞者悲歌渭
水握竿人紫萸且盡長生酒富貴行看逼買臣

沈郡博澹滄歸田投贈兼柬令嗣仲容二首
丁巳偕君廩學宮後先出處漫追从廣文蘊敞寒
猶在彭澤瓶空性轉慵鍼砭黃鸝聲入耳膏肓白
石癖填胸自來丘壑天常吝不是高人不肯容

其二

半醒半醉夷猶日無病無縈落拓仙架上圖書隨
意閱檻前山水逐時鮮魚吞香餌鱗常繫燕累危
巢喙欲穿遺世不須愁簡宗鳳毛五彩更翩跹

感懷用甫士學性之韻

眼空三界遍由旬獨立寥天一愴神抱璞曾嬰
楚荆揮戈常欲靖胡塵青尊味美有佳句綠蟻香
浮無可人慷慨悲歌還自詫高山流水幾回新

登山次前韻

習靜幽齋已浹旬起憑高閣更怡神山間賸有謝
安屐扇底應無庾亮塵碧木丹山剛著我沙鷗埜
鷺故依人臨風爛醉發長嘯詩思秋光兩鬪新

題郡伯車子仁慕椿卷

嘉禾連稔荷春涵化日祥霖處處覃民有去思知

報主親無遺憾貴生男典榮黃壤鼎成五册拜丹
綸命且三永慕休銜風樹恨已看錫類遍江南

壽跋卷

壽母南來馭板輿護枝和桂艷庭除使君養志非
甘毳天子旌賢賚璽書陟屺幾人猶白髮舞斑若
個盡華裾長生何必尋靈島眼底蓬瀛自有餘

陸母董孺人故太學伯蓮元配也太學捐館
三十年而孺人克家教子如一日令子孺
蓮學成爲時名士會須致身顯親則孺人

苦節之報也聲諸詩歌以揚懿美云

熒熒卅載未亡人萬死寧移不二身機上滴殘紅
淚雨鏡中銷盡翠眉春貧供菽水心如擣苦和熊
丸味更真林老漫勞評月旦旌書旋見紫泥新

渡瀛海寄河澗令徐東磐

獨跨雕鞍出漢關却从瀛海望天山屠龍有技身
猶健失馬無心夢亦閒是處烏依青苑上誰家犬
吠薄林間楊梅正熟開簷蔔且襲香風破醉顏

別門人林孝廉龍津

重銜簡命出長安兩度移官兩度閒千里憑誰歌
折柈一杯多爾醉征鞍郊原極目惟豐艸旅次關
心只故山衣鉢向來原有托好將吾道障狂瀾

途次濤滑過東平山同年陳珍凡守州不得

一見

策蹇披泥百道環問闈不覺淚潏潏宦情已逐孤
雲遠行色渾疑五月寒忍向蒼穹嗟螻蛄敢將丹
惆瀆龍顏途窮自管無知己信矣人間行路難

寄某安人

火棗交梨獻海東錦闈清宴彩雲中兩髦獨矢共
姜嫄三徒全收孟母功綸誥自天濡湛露絃歌隨
地暢淳風萊衣分得袍花艷笑舞庭前樂未窮

過李司業故第二首

余與李自髫年同爲諸生甲子同計偕談
誰甚得乙丑李登高第俗子趨伺匍伏惟
謹余詼謔如初李遂銜予戊辰李分考南
宮予卷在周傲菴公房擬首選李故從總
裁所讒以關節落之子偃蹇南歸而李永

繡畫行張甚漫謂予曰我每入館中輒念
尊祖丰采蓋先曾祖蘧菴公以鄉魁不獲
一第仕爲翰林孔目故以是況我也而爰
人袁坤儀每規予曰子何不少自下謝彼
哆口至甲戌予亦成進士而李病痿病狂
以歿矣先是李藉同年許令以臬司爲第
宅燬佛閣以自封不七載其子以售于新
郎葉君而李病時大不愜于金令餘山金
予同年也予時憂居每過从必諷以禮及
李物故予移書責金以大義金悟卒全其
家以今觀咎夢邪真邪經其居不覺惘然

柏臺已剪舊時陰劫火俄驚古剎殿突兀高牙猶
似昨參差短券遂如今廢典過眼三更夢生死論
交一寸心宗宗九京那可作不堪落葉掃空林

其二

黃葉隨風而地堙李花狼藉委城闔驚人勢焰原
如水回首名途業已塵寶劔有神還自合浮榮無
蒂竟誰真只今贏得將衰老且買渡舟理釣綸

丁亥水災贈邑令

百萬虀羸赤手扶忍教澤國浸萑苻
剗裁小試湛盧劔指畫全勝祕景符
滿地棠陰堪共憩頻年菜色已全蘇
請看諸道旬宣使辛苦誰如子大夫

己丑旱災又贈

蒲廡就蓋若爲哀撫字如君天亦回
來暮賸聞追徃事去思早已入新裁
均調緩急烹鮮手經緯分明製錦才
百里其霖秋已遍遙看瑞氣上三台

贈沈魯卿秀才

秋色寒塘逗鑑光風翻菡萏水痕香
鳥鳴伐木聲相應室借芝蘭韻倍芳
卓犖雄篇追景福相將珥筆奏長揚
休文才藻憐腰瘦白紵歌成到建章

丙子秋余在閩闡董易書之役至乙酉復以
謫吏于役江闡有咏

秋闡兩度督傭胥轉眼江闡十載餘
珠海森茫鮫有泪遠廬荒冷食無魚
黃金浪說能求駿驟耳猶憐未御車
一夕西風飛桂影寥天獨步認干旟

邯鄲才人將嫁爲廝養婦

白首宮人被放回却依合殿再徘徊莫从厮養牽
裾去曾向昭陽奉帚來日色每于花底換朱顏況
復鏡中催皇恩若使畱青盼猶是當年續史才

卽懷

垂楊夾岸嚙輕烟水外絲竿物外緣着眼河山猶
昨日關情容鬢憶當年窮途置足無餘地聖世捫
心肯負天梁甫吟成還自領孤舟橫壑載雲眠

姚大叅隱居

居黃山面俯西湖巷稱大隱人家

幽亭高架倚吳岑大隱歸來入市林返照躍金鋪

水西晚霞散錦落湖心雲山共獻千重秀花鳥平
分一半陰最恨萬松山下路不堪凝睇憶天真

有天真書畫本
張正長詩卷之二

中秋排悶二首

良宵費酒強登樓去國離家總是愁客舍荒涼空
有月征裘凋敝不宜秋十年好侶餘青鏡萬里逋
臣尚黑頭試向仙娥問消息人間何處是滄洲

其二

暫攜一劔客杭州風景蒼蒼亦壯遊鼉鼓驚心惟

半夜鶯花笑我又中秋誰人春命來宣室何處笙
歌宴庾樓獨有蟾光最相惜陽春纔唱彩雲浮

渡江寄孫潯西侍御

戀國懷鄉一寸心塵途多故獨沾襟嶺猿已過三
聲淚塞雁先傳九月音淪落始知官計拙紆回漸
識世情淡浙江南去二千里望斷紅雲與綠陰

三過釣臺

千仞峯巒百尺灘披裘兀坐獨垂竿平生魚水風
期合一臥烟霞午夢殘高士有心常慢世清時何
意得閒官十年萍梗看三過怕殺紅塵道路難

秋日懷舊尹金餘山

東籬歲晏稻梁新降酒登高憶美人七載絃歌鳴
里社千家雞犬信農辰恩周雉子心如母膽落狐
奸政有神種得四時花萼在金風吹處盡生春

煙雨樓懷龔毅所郡伯

千季渤海政猶新此日嘉禾牧字頻再見閭閻還
揖讓从教窮谷遍陽春釣鰲磯迥烟雲歛白馬湖
平雨澤均只有任濤最踈拙儘容吟眺及芳晨

巖瀨感懷

出處無歸信陸沉
竭來磯下挹清陰
已知玉石無成價
却恐涓埃負夙心
湍急未應鱗得縱
餌驚行見逝偏
淡寥寥千載知音
在日暮聊爲澤畔吟

富陽令素無禮于遷客一士人嘆之感賦

楚楚空林暮色平
蕭蕭官舍旅魂清
已知霜露皆元化
敢以炎涼論世情
櫪馬恥云思遠道
溪鷗終不負初盟
風輕月淡芙蓉渚
聽盡寒流五夜聲

撥悶

誤從委巷僦鳩居
幽抱何由得暫舒
送酒巧當人瘁後
催租剛遇月明初
質衣未贖寒先到
葺屋方乘雨竟沮
猛向遊仙寺一快
赤蚊玄蚤觸華胥

秋季之貶道經艸華公署讀忠烈公詩不覺

感泣賡韻三首

簪時銜命倅閩方
車轍虛將一臂當
幾爲權奸其去就
却因鰥寡受窮忙
朞年受事心惟赤
七載憂讒鬢遂蒼
寄語當塗持論者
少畱公道與朝堂

其二

手握魚腸走四方，綱常隨分可擔當。
漫云散迹難從俗，却愧閒官也自忙。
艸就未應玄尚白，染來無奈素爲蒼。
百年忠烈須知我，總把丹衷托廟堂。

其三

秋水伊人在一方，幽懷暮景最相當。
兼葭波靜蛟龍遠，木槿花繁蛺蝶忙。
笑向此生甘落落，莫將孤憤顛蒼蒼。
願渠終運回天力，金紫長年白玉堂。

貴溪道中

十二黃頭發擢歌，一年途路盡風波。

于二月初入京五月領還

命下九月

故鄉豺虎縱橫甚

壬午王令華源別歛頌肯復以

請入室妻孥徧謫多

聞官冷落衙役無迎候者

赤滿楓林鴻杳冥，綠浮村釀客蹉跎。
采樵在野

渾無賴，放志清狂奈我何。

莫春新吳志感

三月春陰一夢中，周南畱滯歎飄蓬。
逃名已愧爭蝸角，攬轡無須試蟻封。
玄鬢錯教閒處白，桃花原是謫居紅。

冬夜夢枕花感聞人云春權之

北乃新吳官舍所見宛如夢中

羈棲情況憑誰話，長嘯臨風天地空。

七夕解嘲

井梧初墜露霏微雲自氤氳鵲自飛天迥玉躔疑
暗度月明銀漢失餘輝只緣慾界多離合翻使仙
源有是非寂莫張槎那可問浪從織女覓支機

賀邑侯壽誕

皓月凌秋景獨融使君嘉誕五雲中脂膏遍墊棠
堪憩琬琰存碑艸竝豐卓魯幾年淹百里夔龍且
莫際重瞳古來賢相多循吏華髮旂常軼漢宮

聞讞四首

秋厓截薛倚穹蒼下有幽人踞石牀慣見螻螂常
載魄忽逢魑魅恥爭光中庭得月桂仍發幽谷無
風蘭自芳縱目海天原空濶莫從井底測行藏

其二

傲骨惟便木石居故人萋非定何如禰生漫爾憐
鸚鵡漢帝從誰見子虛我已還山韜卜壁君猶按
劔抵隋珠息機隱几惜騰睡多口無端忽起予

其三

風塵廿載世途難歸臥山扃重自完散髮獨尋河

朔飲披裘休作拾金看
泣牀直欲批刁協詠洛終
當識謝安妖鳥經秋猶鼓舌
曉霞千頃碧天寒

其四

秋來灝氣滿神州
掉臂臨風汗漫遊
俠骨幾年嘗拂劍
朗懷此夜獨登樓
常憐易水人空去
還恨金臺駿未收
世態浮雲那可問
蕭條千古一漁舟

和荅龍大章太學四首

傾蓋風流喜遇程
蹇淹征騎語浮生
千秋俠骨虛燕市
萬里雄心狎鷺盟
綠蟻光涵新漲碧
陽春調

迥莫雲平河梁抗手鍾期遠
莫寫高山出付紫瓊

其二

白眼摩挲獨段程
百篇十酒太憎生

時有罵名者

半空

聲裂蘇門嘯五岳雲封水石盟
嬾拙此身疑叔夜
垂簾終日信君平
梅花香後無佳句
強入新裁一報瓊

其三

斗室神遊百二程
英雄天地亦虛生
嬾從巴里調新曲
且向龍門締舊盟
白鹿紫芝吾不老
唾壺鉛

筑意難平麋蕪綠遍渾無賴漫掩玄關鍊八瓊

其四

片帆春水足飛程世路交情貴賤生

龍片渴章
命不見

抱

璞無端時縱酒釣璜有夢故尋盟石門路僻宜靈
運鸚鵡才高惜正平藻句逼人卿太橫佇看繁價
重金瓊

客有攜七夕詩至者皆淫媠怨詞用韻反之
潦倒西風憇午橋也隨兒女競良宵銀河隱見疑
仙駕金盒縈紆詫紫綃巧拙有緣人自乞合離何
意語空招傳訛似此知多事且拾新詩付酒瓢

聞信四首

余庚辰之貶主于某謀于某而某寔媒孽
其間至丙戌之讒又復尸之乃甲午鯤死
乙未向死周朱罷官岳又以賊戍聞之不
覺愞然自失

驚看玉碎瓦能全正是黃楊遇閏年羽箭不辭櫻
彩鳳爪牙爭願効鷹鷂閩中霧重疑無日林下雲
開忽有天點檢生平還自領漫因邸信一瞿然

其二

牢鹿風塵十二年多君下石爲周旋數行白簡憑
人畫一掬丹衷只自全時過冰山終是泮勢窮與
寵總無權蕭蕭野渡殘楊樹冷笑歸鞭有後先

其三

當年智罟足彌大今日天開聖鑒宜松逕未荒元
亮去蘇臺云墮伯嚭還懸知夢熟三更後却悔棋
爭一著先來路何如歸路穩蒸羊無便托雲箋

其四

平生不識宣州史流矢無端似有緣傀儡故應爭
巧拙矮人何意浪娘妍身披貝錦謀非左塢築辛
夷兆已先乙酉冬入對進奉入辛夷院蓋平生未
嘗識辛夷也茅屋石田投老處臥聽五
馬日三遷西北隅而階有辛夷花
因築直之堂亦數畝

草邑侯以詩貽贈用韻賡復二首

白露蒹葭久杜門溝中那復望犧尊垂衣已負生
平遺藿食空銜國士恩髮短漫誇心尚赤齒長羞
覩舌猶存獨憐楚些多情思澤畔依依苦頌蓀

其二

手持世笏出金門善政多才衆所尊春到有情皆
頽化陽回無地不舍恩清詩迥逼黃初上章艸俄
驚舊觀存更愧殷勤推詡意直將蕭艾比芳蓀

送嘉興鄭明府太仞人覲二首

輕舸如葉汎帆開夾道遍留首重回四載棠陰淡
樛李一時駿價涌金臺臨風暫覺飛鳧遠對景常
疑竹馬來朝罷定前明主席垂綸休道子牙才

其二

少年穎異擅聲稱正是南陽佐漢齡長水霜凝春
尚凜鴛湖月映夜偏澄危絃觸手看調瑟朽索關
心歎飲冰自古循良多特拜鷓鴣班翹首佇先登

憑高獨眺

一巢佔勝倚飛勞身際層霄最上乘老去黑頭常
自笑貧來白眼更誰憎名歸趙孟忙軒輕利任陶
朱巧弋贈風御冷泠諸品靜沈寥天外片雲升

卽懷

忠赤生平貫上蒼剔奸何意挂彈章沉寃已結三

季早激憤應飛六月霜天道循環終有復人心紆
險竟難量馳驅未遂涓埃願千古英雄淚滿眶

遇同年王吉山子

廿年雁序久投膠痛子箕裘遂燎毛欲拯窮途修
世講輒于同志取前茅稔聞越后追高躅勿使劉
標恥量交若激西江須巨力慚余一勺覆堂坳

有松士以倩筆見窘於魏溪自謂半世英雄
無端受折聞而慰之二首

半世英雄已白頭香从結客少年遊家無儋石常
輕擲袖有明珠却暗投去魏幣然逃厠簣歸秦空
自泣貂裘天涯失路誰知己俠氣縱橫貫斗牛

其二

沈寥天外豁雙眸倪首僕躬步九州石轄崑崙凌
絕頂左睨溟海挹微瀝角端久縛鹽車輓鶩驚俄
嬰露多學間世英雄何所事長空極目又窮秋

夢所思

夢中作

懷君無復見君時風雨連宵倍有思駭問別來殊
艸艸俄聆囑語更咨咨乍逢自恨從前隔又去誰

憑訂後期聚散邯鄲原孟浪幻中情事夢中詩

悼亡爻

文學靈輻返故鄉南州絮酒意偏長
讒深駭見三投杼義重還焚一辨香
薏苡休騰車下謗龍泉難揜匣中光
夢回轉眼成今咎郤塢侯鯖總北邙

止謗

逃名扃戶避庾塵何意流言陡地侵
市虎俄驚慈母怒歌鴟終白老臣心
敢將盟血追疇咎忍見椒觴訟似今
聞道讒人能覆國可知傾覆到山林

復袁坤儀

廿載周旋跡已陳雨雲翻覆竟如新
參差按劔投珠客慷慨論心把臂人
世路羊腸還自領夢中蝸角定誰真
頭顱相看今何許雪影蕭蕭兩鬢均

卽事

垂楊宿霧艸玄亭隱几翻然愧獨醒
薄海烽塵重譯騎滿城烟火五侯鯖
營中銳卒無完甲輦上詞臣孰撼鈴
永夜悲歌頻易枕匣間風雨吼青萍

穀雨卽事二首

萬曆甲午按君風力特勁湖郡惡少乘機
鼓煽伯千爲群架虛投詞因行劫諸巨室
諸巨室譁聞御史定命之靡敢抗者卽大
宗伯董公宮允范公受害甚慘暨諸閭左
無賴亦相攻剽報復湖郡幾爲長平坑吾
郡與湖接壤諸惡少攘拳以望逞者無慮
萬人巨室愿死身語涕泣周圍如負重譴
閱二月兵憲韓約菴入言狀稍改前轍不
大擾然諸惡少先期請張恐喝良民爭致
金帛具酒饌以奉如互市者亦閱二月而
叢祠浩宇潔豚酒祝禱脫禍者香炬之燄
熏天際云至三月牒事甫定士君子相醵
脩俛而穀雨適值其辰人人更相慰藉自
是得耕于墊矣咏此以紀歲月

早乘霖雨帶經鋤送酒人來
訟彼除萬事皆慵猶
種竹千金盡散只畱書
長陰陡覺和風動
安步徐看化日舒
不是狂夫偏玩世也知天地亦蘧廬

當門蘭茝故應鋤塞路荆榛詎易除
雪水更無脩
袂侶由拳剛有未焚書啞啞猿鶴聲
猶咽楚楚松筠葉乍舒
滿目江湖休厝足祇須拚杖入匡廬

初度二首

眼底流光逐逝波
顏顏頻向酒邊過
三朝仕隱身須絀
兩世清狂倖已多
新翠拂雲森玉笋
濃陰遶屋幕
金柯盱衡走筆傾
千古問看塵中赴燭蛾

其二

且袖陰符篋
太河臥聽四塞滿
干戈塗成白雪知
應家問熟黃芽
髮未皤
老計可能虛
歲月官身那許臥
烟蘿
細將殘局從前勘
得數
于今已較多

李廣文致歸

朝對華簪暮卽投
飄然宛繆竟迴
暢堂溪
雀鱸聲榮起
水足尊鱸典
味幽北海
吟絢猶望斗
東甌
砧杵又驚秋
丹楓翠嶽風流
近肯放紅塵染白頭

怨艾

寓形寓內盡含靈
我獨何辜萬慮衡
赤膽豎勳讒
旋伏白頭砥
行妬偏櫻同舟轉
眼皆成敵
異域無

端亦吠聲直得瞥然逃廣漠長唵覩縷訴平生
午節用杜早朝韻二首

懸門不必爲人艾止惡何煩刻印桃一棹遊龍追
屈子五湖乘鯉汎琴高鶴形龜息身無漏招鳳吞
芝耳有毫眼底風塵安足問茫茫大塊等鴻毛

其二

千秋競渡悲魚腹一上曾緣殺二桃漁父尚疑心
獨苦雪脩詩辯調高葵片漫爾空傾日樞火何
因解察毫自是勝人多薄命王嬌終古竟銜毛

柬沈仲容馮行之敘之

時分葺邑乘

菜園八子歎聯翩素節清才羨爾賢關節不阿如
錢筆冰心羞道迹牀錢肯將一斛要丁庶寧爲黃
余屢太玄革袞儘堪榮白骨幾家生氣到重泉

贈馮濟之

白首經生彈鋏日青山逸叟著書年西堂春艸惠
連夢虹月滄江米芾船齊瑟見君追大雅楚騷添
我續新編鴛洲卜舍羊求侶濁酒長唵聽晚蟬

鬢髮復蕃

閒來攬鏡倚前榮
黷髮如童見幾莖
潘鬢悔從愁後短
呂丹驚向悟來成
固知松柏冬逾茂
豈類蟬蜩暮不生
對景朗吟聊自喙
未須懸想慕臙彭

支華平先生集卷三

支華平先生集卷四

樵李

支大綸心易父

著

排律

送王太史冊封秦藩便道歸省

磐石宗盟固宸章
日月昭使旌遶玉署
分寶下丹霄
遷史遊方壯
王陽馭自調
萊斑裁畫錦
僖頌溢春瓢
爲愛華南日
寧馳隴右輶
萱姿娛晚翠
蘭樹挺清標
皇事須將母
臣心更祝堯
講幃虛席在
側耳聽回鑣

東途阻水

山東霑潦後周道盡波濤在陸凝浮水驅車若泛
舠淺波猶沒脛淡涉欲齊脰騰沸陵爲谷飄搖粟
是菱淤泥行跡遍平土望中勞失路知予命愆陰
復爾遭知津慚沮溺幽蹈愧澳樵猶喜沈腰瘦兼
憐冀足高滔滔聲利客何日曬征袍

丙戌除夕

除夕長爲客今宵始在家都無官長罵終鮮吏民
譁弱息聞詩悟邨童得句誇送神朝褻楮守歲夜
烹茶泥俗知無術浮生會有涯素心便鹿豕春睡
足煙霞對鏡丹如泥操觚墨作花方壺多夙約祇
用覓金沙

九月十九日爲章母初度賦贈

南極翁躔丙重陽復法辰天符照樞社佳氣下高
旻名閥鍾前遠芳閨毓秀醇齊眉坤順肅和膽母
儀真故繡由夫貴新封白子申一經勤督策廿載
歷適屯貞母無瑕璧仁侯有躑春恩波覃涸轍丰
采動朝紳花縣神明宰楓廷骨鯁臣承顏多聚順

養志重宣旬絃誦長生曲豐穰瑞露珍四郊開壽域千里播韶鈞象服斑斕豔鸞章祝頌頻滿斟醪是玉細擘脯爲麟拜舞民人叶歡歌雉兔馴展如無量佛不數八千椿

感徐節婦事志慨二首

藍田猶失種鳳偶忽摧殘風燭慈顏莫晨炊歲計殫生前言可負死後殉何難仗友棲泉魄憑人發纓端含荼捫日夕嚼鐵厲心肝痛徹天應老操冰夏亦寒從來無信史祇炳寸心丹

其二

南州標異節少寡古來難種玉前期絕瞻雲莫景殘囊空悲瀝髓鬢積痛摧肝已分蒸嘗盡誰憐菽水殫拮据終永托憔悴盡紅顏昔也言同穴今茲定蓋棺投崖情共烈截耳壁俱完鐵石猶堪撼冰霜未是寒無勞鐫志艸已列婺星端

贈姚節婦

香奩方侶鳳青鏡忽分鸞靡恃家多難無兒祚更單幽明千古恨生死一身難風膳含頻進遺經帶

淚看紅顏心欲碎黃壤魄應安送徃仍當尸貽謀
獨和丸痛淡天地老節苦雪霜寒信史鐫金石千
秋炳若丹

題同年馮源泉太夫人貞節錄

笄櫛歸君子相期百歲長棄捐在中道死殉何倉
皇伶仃牽弱息風燭思高堂孤燈時慘淡夜雨幾
昏黃調膳聽雞早傳經促織忙只將心比鐵不覺
髮如霜子壯名將起親終事已襄玄扃他日面綠
鬢谷年腸魯鵠堪賡咏姜舟足嗣芳清朝旌詔重

奚獨里間光

贈於秀才

昭代二千石箕裘得子賢賦成垂十載帷下又三
年繪藻天葩豔鈎玄象帝先芝蘭真臭味葭莩托
姻媿治策工晁畫憂時泣祖鞭行藏虛歲月勲業
寄韋編佇擬層霄上崢嶸更孰前

輓余明府二首

抗手杉青許丹楓露未晞鷁舟虛迅發龍劔忽翻
飛雅量空湖海高懷畧等威暫違猶愼慕長逝可

歎歎黔首追遺愛千秋炳若斯

其二

余侯良已矣齒屑正分霏交道殊存沒冥途有是非
亂拋分手淚猛扇蓋棺誦易啗唇間蜜難防腹
底機只應林下安猶自惜畱衣

石城土秀峯卷

西江挺奇觀高削玉芙蓉材植初封梓庭栽管剪
桐巉岩二鳥似磬石萬年雄入老傳丹處青藜照
卷中願言崇大雅一德拱堯封

漫興

孰謂予年老才高命可衡玄英行自至白髮敢橫
生日見孺枝萌心驚鳥知童去秦幾已兆獵渭夢
須成慷慨黃雞淚千秋共此情

絕句

雙林宴

臚唱鉤鉤下玉宸飽花初試聖恩新宮醪醉出長
安道紅紫三千別樣春

出關口占

下帷跌坐七十日忽見天光發杳冥萬里晴空雲
盡掃一江沉碧浪初平

渡章江大風雨

江風如吼雨如傾萬頃波濤一葉橫試覩奔忙名
利客也須到此念頭輕

懷册禁

會試例無搜檢嘉靖乙丑始設時被逮者
十餘人

感世方崇洛下才嘉賓曾宴鹿鳴來從聞入國須

知禁今日官家禁棄灰

挾册者被逮咏桃諷之

仙桃一種倚雲栽珍重徵求萬里來却恨無端貪
結子隨風狼藉委塵埃

七夕

牛女盈盈隔水遙祇憑靈鵲爲填橋世情對面成
千里那得雙心一夕交

門人陳文學過從

烟花絲竹遶春城喬木嚶嚶鳥自鳴艸就玄經愁

宗莫問奇剛喜得侯生

讀史十首

漂母

封侯推食渾閒事何自翻爲老媪哀
却報數言殊咄易吾嫌一飯是嗟來

虞姬

鏖戰睢陽水不流三千女色銳全收
可憐亘古英雄淚祇爲虞兮灑髑髏

鴻門宴

玉球屢翹機尚淺當筵舞劍術尤疎
縱教如廁能潛遁何不先批瀾上虛

子房

仗癢英雄不自持暫仇聊爾藉名資
快心三月咸陽火何似虛投博浪椎

淮陰

鴻溝血誓俄成幻帶礪金盟條已寒
躡足假王瑕曩啓可憐感項是夷韓

沛公

火燼咸陽勢已傾并齊收趙更誰爭可憐夜半陰
陵道無復鴻溝兄弟情

文帝

浪傳絳灌忌才華不道文章忌當家宣室夜分前
席罷少年應是老長沙

匡胤

頃刻黃袍與禪壇趙家神術過曹瞞只緣傳得陰
謀在金匱盟言忽已寒

光義

斧聲燭影奸全露金匱遺謨事總誣天定勝人踰
七世秀王曆數恰相符

秦檜

一旅江南巢幕燕驚魂殘息敢稱師康王偷取和
戎利浪道金牌出會之

讀鄉書喜心復萌自咎證修無力有咏

逐隊隨行三十春蹉跎不覺二毛侵何時得見周
元老消盡生平喜獵心

入京往別徐嫂不荅而返口占二首

短褐逢春又遠遊，叩門無語淚長流。
剛悲伯道肩幽戶，忍向空庭啜茗甌。

其二

十載風塵走逐臣，愁多豈爲守官貧。
徘徊伍水烟雲散，不見當時仗劍人。

亡友徐志山賞陸虬川謨舊居豐前橋左經

其戶爲之懷然感賦二首

培塿瓶山色自青，川蟠門左作虬形。
嚶嚶黃鳥鳴如訴，不似當年伐木聲。

其二

危樓終夜泛金卮，爛醉狂歌倒接離。
一自河梁攜手後，至今長抱子期悲。

訪徐妓過虬川故居

徐妓，徐志山女。

樓上誰人鎖白雲，橋邊伍水自泆泆。
中郎有女渾無賴，野雀群欺燕壘琴。

卜居熙寧渚憶徐陸二亡友二首

徐悱登城古意空，陸機去鶴唳雲中。
眼前風雨多番覆，歲晚誰爲田舍翁。

其二

栖栖萍梗一逋臣官罷蕭然倍舊貧漫向門前栽
五桺南鄰那得素心人

明妃怨二十四首

余故疎簡不習爲吏于役泉南匝期月耳
乃屹屹效古循吏蹟謂孔孟之道必可行
于時士民翕然稱之洎以憂去士民思慕
如初越二年所爲仇者所傾幽憂聖室自
怨自艾因念王昭君以殊質入宮卽不幸

猶在灑埽末毛延壽狡焉中之迄殞絕域
矧萬里孤尊哉聊爲吟詠以助擊筑語云
長歌之哀甚于痛哭詎不信夫

清晝淡沉扃鑰莫驚鑣轆是宮車假僥得備椒
房役未必當熊讓婕妤

其二

徑路無媒不自由明珠忍向暗中投蛾眉自管多
嬌妬幾個承恩到白頭

其三

曲房長夜聽秋砧絕曠由來志念淡辦取赤心事
明主賂工何處得黃金

其四

千金纔得備朱軒百萬方能近至尊陳后筮年多
寵盛也須司馬賦長門

其五

染就香肌粉未勻黃金一着倍生神本來妍醜誰
還識塗抹由他筆下真

其六

女史無階進彤管猿工任意舞毫端何當自獻披
香毀倩取君王仔細看

在宮中一然

其七

自倚芳姿徹骨真好修那忍贖錢呻今朝上馬肝
腸斷却悔花容解悞身

其八

緘恨含顰怯訴春下陳舊矣妾身新儂家自被丹
青悞豈是丹青欲悞人

其九

敢怨生身命不猶敢嗟粉績故相仇踽踽株守離
宮下縱有恩波那得周

其十

帷幄原非乏運籌封疆應也足戈矛自憐無補昭
陽役拚取微軀爲國謀

其十一

妾有真心主有明筆端誰道巧相傾當筵奏對天
顏悔始信君恩本不輕

其十二

毳裘毳結若爲容羞對菱花泣北風玉質任教憔悴
盡也應不似畫圖中

右薛宮愁

其十三

宮人負寵如雲騫画工搖筆如風翻而今不用更
相妬已抱琵琶出玉門

其十四

漠漠黃沙黯黯陰琵琶咽咽恨沉沉胡人不解思
君調笑道全勝傑韎音

其十五

朱顏儘奈黑風吹一寸丹心男子奇若比祁連山
上石沙埋雲鎖不輕移

其十六

飄飄豔質向誰榮損我容華益我名試向宮人斜
上望和戎若個更馳聲

其十七

自從騎馬出瑤林萬里烽烟接塞陰不是君王剛
棄妾妾緣自淺聖恩深

其十八

拚却微生靖虜塵只愁腥虜未堪親自登止是傳
空影見說闕氏已沸脣

右出塞怨

其十九

夢生不逐大羊腥萬死終須死漢廷記取他時原
上草千秋應作漢家青

其二十

帝家女伴三千侶北使蕭蕭不寄聲若問妾心天
外月照將瀚海色逾清

其二十一

右賢王信自龍庭傳道丹青盡伏刑窮海只今知
漢德却從油幕聽和鈴

其二十二

織得迴文獻紫宸帛書血縷染胡塵君王只道邊
陲靖未解沙場飲恨人

其二十三

南飛征雁寄遺音萬里風塵紫禁深合殿由來知
已少誰人剖取歲寒心

其二十四

淡漬織羅字有痕紅妝凋盡漢環存妾心便訴君

王道未必邊塵解斷魂

右穹廡怨

問道傍棄婦

金鈿翠髻石櫛借玉質冰肌腦麝薰如子丰姿應
絕世爲誰哽咽不堪聞

棄婦答

嬾修眉嫵向東風自管承恩不在容班后哀時飛
燕棄由來新寵亦難終

信州公署

玉露楓林旅雁寒綠蕉分影入雕闌自憐兩度來
江右不是閒官卽冷官

聽百舌

間關百轉任雌黃短喙無因抑與揚最是幽人春
夢後數聲腸斷巧如簧

聞鵲

蘆汀颯颯渡舟橫臥聽波濤幾度更怪底鵲聲頻
入夢乃公河上學逃名

題扇景

一葉扁舟一釣夫茅亭淡處埽寒蕪醉吟梁父聲
如吼天際浮雲任有無

七夕乞巧六首

謫來兩七夕矣况味聞寥無可與語良宵
對景率爾酬唱豈惟搖落之悲哉

翠幙淡淡鳳幄開玉街隱隱鵲飛來謀生百拙從
誰訴天巧憑君取次裁

其二

華幄香闌日日開銀河清淺鵲常來不知帝子綠

何事故遣佳期隔歲迴

其三

纔渡雲輶曙色催却瞻歡寢意徘徊匆匆群緒猶
難盡巧思何因乞得來

其四

巧術縱橫日月昏巧言截截更瀾翻天孫似厭塵
寰巧故逗佳期隔歲論

其五

莫將修曠怨星河未似人間別怨多失路天門應
似海年年爭得一回過

其六

奠水溪恩夙昔同盈盈一水遂無從君門萬里孤
臣遠縱巧如何得自通

得巧六首

處處穿針望碧霄天機札札閃紅綃西來青鳥傳
消息定擬佳期在此宵

其二

玉梭金鑷綵橋頭星月亭亭水不流早泛靈槎移

桂馥便從脩渚渡牽牛

其三

佇瞻龍輦渡河時
牢把霞裾問別離
才調只今誰得似
可教畱滯乞蛛絲

其四

娟娟靈匹倚層穹
曠歲幽期一夕通
最苦人間魚水契
忍令齟齬歎英雄

其五

輶車綉幌赤光浮
入寶雲囊五色稠
慙愧天孫分

巧意浪陪王母叱三偷

其六

讀盡殘編閱盡人
間將巧拙細評論
人間巧盡終成拙
天道常將拙勝人

秋興四首

橫空孤鶴警秋鳴
老驥長嘶萬里輕
愧煞壯心無處耗
漫從野爨學長生

其二

東封西禪五雲車
烽火甘泉擁翠華
漢帝憐才似

飢渴念儂何事到長沙

其三

蘇子坡前夜色涼
徐君祠畔藕花香
西山爽氣章江雨
裝點閒官日日忙

其四

遼左滇南兩歲兵
吳山楚水困輸征
芙蓉幕下梧桐雨
挑盡殘燈夢不成

園居雜咏九首

看花

暮日枝頭爛熳花
一宵風信委泥沙
浮榮自管無根蒂
何必沾沾傲物華

對酒

剛向瓊筵快舉觥
無端傀儡早收棚
長安貴客如中酒
席罷醅醕盡日燈

觀雲

天際浮雲一瞬更
飄風那得浹辰鳴
人生僅似埃棲艸
敢向洪鈞索滿盈

駕舟

世路風波洵未平
乍來逆順漫喧旬
長年三老雖多伎
安得飛帆十日程

鷗渚

臥向沙頭狎鷺盟
摩挲白眼醉來瞪
西臺風力徒云猛
不似晴空一羽輕

夜坐

軀殼飄飄一水漚
更從漚外計沉浮
可憐夜半真歸性
都付名根與霸謀

櫛髮

黑髮馳驅短鬢休
閒居底用思如抽
生憎幽薊饒霜雪
一染風塵便白頭

山亭

天空日落鳥飛還
錦砌丹霞遶翠巒
十畝野塘千個竹
人生何必老長安

野眺

少年喜事近來慵
遮眼文章義亦慵
臥起憑高紆倦目
閒雲幾片落長空

送郡侯張程川署縣還郡十首

世路風波洵未平
乍來逆順漫喧訇
長年三老雖多伎
安得飛帆十日程

鷗渚

臥向沙頭狎鷺盟
摩挲白眼醉來瞪
西臺風力徒云猛
不似晴空一羽輕

夜坐

軀殼飄飄一水漚
更從漚外計沉浮
可憐夜半真霽性
都付名根與霸謀

櫛髮

束髮馳驅短鬢休
閒居底用思如抽
生憎幽薊饒霜雪
一染風塵便白頭

山亭

天空日落鳥飛還
錦砌丹霞遶翠巒
十畝野塘千個竹
人生何必老長安

野眺

少年喜事近來慵
遮眼文章義亦慵
臥起憑高紆倦目
閒雲幾片落長空

送郡侯張程川署縣還郡十首

十載驅馳紫陌塵
宦程紆復聖恩新
响响乳哺張
明府曾向中朝律
貴人

其二

前渡波光徹底清
再來風骨更瑋瑋
願磨胥嶺忠

臣石記取西曹法吏名

公甲午冬來
蒙戊戌春再至

其三

雞犬無聲散曉鴉
荆條不刈足桑麻
使君原是陽

春脚畱得東風與萬家

公自昔不遺
人不見

其四

十萬漕儲一字平
千金不染半毫贏
縣刑冗蠹都

蠲盡兩月誰云福力輕

公漕儲蠲浮費
徵金無羨
公於漢云視事兩月日淺

澤
微

其五

似聞仙鷁向西來
酌墓俄驚覆綠醅
追送無緣非

中酒怕看水滸一瓢開

公六年集
仙文追送

其六

百日陰霾一日晴
老天應解別離情
魏溪三月烟

花景夾道遮畱緩去程

春來久雨
公歸日獨晴

其七

不向山頭挂紙錢不從脩禊到江邊喧騰萬口攀

留者只訝今朝遠二天

公在三月三日曾遊清湖

其八

雨足郊原薺麥新風和桃李櫛門春別來河畔千
株柳青眼依依亦帶顰

其九

只尺禾城望渺然去思來暮共喧闐松窻月色桃
花雨一夜懸心似隔年

其十

使君望實六曹先澤國行珂亦偶然上苑名花須
種植莫雲有日憶江天

少尹朝回投贈二首

自攜手板出鴛班兩度雲霄顧盼間良吏不矜君
寵渥天威只尺不違顏

其二

溽暑馳驅方緝貢凝寒策馬復嵩呼知君亦有陽
春調不向松間只自哦

寄水部章循之八首

章舊爲邑令時督稅蕪湖以詩見貺

一從分手出西郊夢寐常驚迓節旃自是七年情
若水誰云千里不神交

其二

欲知遺愛在甘棠綠柳陰陰遍伍塘七載弦歌垂
俎豆千秋白雪見文章

其三

啼鳥三匝上林枝一疏隄情慰所思匹練吳門看
未足襜帷又報人鳩茲

其四

風流謝眺白雲泉欄幔新詩錦字傳怪得空齋光
徹夜明珠幾顆案頭懸

其五

五雲漢鎖謫仙樓丙夜寒芒燭斗牛只說楚關堪
禦暴那知輦上有應劉

其六

鍊就干將赤鑄山腰間明月挂金環而今使節臨
姑孰紫氣東方定滿關

其七

澆巾濁酒甕頭眠白眼逢人氣轟然借問陽冰依
幕客只今誰似李青蓮

其八

鴨綠行成事枉然甘泉烽火薊門天英雄袖手還
誰識憔悴蒲菰只自憐

送馮文學濟之館廣平徐令八首

浙下傳經已有年又攜經笥五雲邊社中白雪人
千里坐上東風馬一鞭

其二

孔壁藏來簡半詮伏生口授義箋箋漢家若下遺
經詔應喜馮生尚艾年

其三

沙朔風高白馬寒叢臺天外一彈冠中原極目春
應遍賦就梅花好共看

其四

花燈結綺漢宮春眼底浮雲意氣新此去爲尋燕
趙士悲歌慷慨更何人

其五

翩翩國士舊風流春雁隨雲亦壯遊祇是五車攜
不片夜燈風雨腹中收

其六

一肩行李半囊書門外俄看出有車徐令縱云能
嚼糜賓筵何必食無魚

其七

柳條如線艸如茵欲綰長條繫去輪任是封侯年
少事也應難解鏡中鬢

其八

白首紅塵惟仗劔風簾雨葉漫然藜讀書臺上人
初去織錦機前烏夜啼

齊居卽事四首

鳴綠風波勢森然遼陽底自遍烽烟東山不起謝
安石和戰惟爭一着先

其六

爛醉扶歸倒接籬風塵白眼任傾傲孤舟盡日無
人渡月黑濃霜海外師

其三

手握龍泉照膽愁剗犀切玉好誰酬無端長閉豐
城下紫氣空濛貫十牛

其四

五陵裘馬自繽紛委巷窮交獨閉門月色空明時
併映人情安得似秋雲

庚子送余惺韋應舉浙闈四首

劍井會聞瑞氣生掄材此日見蜚英扶搖自有凌
秋關好趁長風促去程

其二

少年裘馬自縱橫鐘鼎功名一羽輕四海黃金推
駿足千秋白雪見飛聲

其三

松石亭前酒色青紫微堂上桂花馨子科吾邑饒
登雋才調如君協地靈

其四

老我曾叨子歲名雄飛今日喜先庚兒曹傲得朱
陳誼好向金臺接翅行

觀芍藥二首

花王已恨殿春光
花相含芳至六陽
安得玄工更造化
會教喜起協明良

其二

仙姿原不侶群芳
待得繽紛已六陽
縱與花王不相值
官啟溱洧漫相將

咏結梅

鐵幹霜葩長異安
無端繩索故羈縻
木來曲直還誰識
世態看來未謂更奇

遊黃金臺有感

振古誇傳郭隗臺
千金市骨致奇才
而今世治渾無用
盡向轎車轡輓來

支華平先生集卷四